


建德縣志

九十


五



				九	漢
				一〇	書
				八	門
				六	
五	二	四	六		
冊	架	函	號	類	

庫文閣內		
元	九	漢
二	〇	書
函	八	
架	六	
冊	號	類


內閣文庫	
番號	漢 9086
冊數	5 (5)
函號	292 45



建德縣志卷之九

藝文志

藝文有志所以記言也古者言為尚書事為春秋
 左右二史分尸其職是以春秋不載秦繆之誓尚
 書不紀桓文之功此其言事之別也自左氏作傳
 言事並在一書而後之作者務存恢博廣錄文辭
 至有列傳詳於藝文畧於紀事而藝文一忘則取
 四部七錄之書惟存篇日記言記事胥失之矣近
 世志乘之體列傳則存其實藝文則收其言分類
 部居各不相掩雖文辭或讓於前而體例實因子



古今以名賢所作議論可傳者掇而錄之都爲一卷而山川題咏亦以類附備觀覽焉作藝文志奏疏

議移州治疏畧

唐州司馬 沈成福

州城俯臨江水先是江臯礪礪崎嶇不平展拓無地置州築城東西南北縱橫纒百餘步城內惟有倉庫刺史宅曹司官宇自司馬以下及百姓並沿江居住城內更無營立之所每至夏中江水泛漲浸沒年別脩理夫役極多補整之間實大勞敝欲求移轉更無去處今歲夏水又湮江岸崩頽道路斷絕附郭雒山

縣置在州東更甚卑下曾經大水漂失葦藏屋被浸沒一州管三萬餘戶置州西界州西惟有四鄉其桐廬等縣並在州東水陸兩途二三百里江山險阻已極艱虞加之夏雨暴至進退不能前有待死桐廬縣令先後三人皆爲赴任上州並遭沒溺言之可痛聞者傷心是以建德等三縣在州東者官人百姓並請移州就建道里稍平輪納租庸沿江甚易空船歸掉遲亦無妨其建德地形高爽當三江之口五縣之中近歲以來不曾遭水若許移州治並移雒山縣入州舊城亦得牢固旣益公私不敢隱蔽

條議嚴緝疏

宋賢

竊臣籍嚴州府居浙上游夙稱民醇事簡訟少糧完
文獻則三元及第風俗則九世同居雖非富饒上郡
亦從來易治之善地也近者窮疲不堪刁囂漸長六
邑之內二年之中士民激變者三見在奏聞臣竊爲
梓里羞之亟取巡按浙江監察御史趙繼鼎特奏殘
吏與敬陳陋規二疏反復讀之并詢鄉人來京之口
乃知淳安近日鼓譟起于徵收緝疋扣索過甚官與
民構府又與縣構遂致激成此變則解緝一事有不
得不亟議者浙江解緝凡五府惟嚴州獨若蓋杭嘉

湖地產桑麻人諧機軸其輪將猶易衢州雖不產
向係本府糧官開局織解于民無擾獨嚴郡既不產
絹又非官解每年編僉田多大戶名曰糧長領價于
本縣貿易于隔府使費旣倍扣剋更多常例之外有
雜費減發之外有禮節官貼私貼給批銷批如按臣
所列陋規自縣至府絹價已去十之三四况復自浙
以至燕沿途過關脚價進京門單舖墊包攬比較費
用更復不貲絹安得不濫惡糧長安得不賠累也崇
正四年巡撫浙江都御史陸完學于絹疋匱乏已極
一疏內議府縣開局官織官解奉旨轉行本府議增

府佐一員如法織解欽遵在案嚴民不勝欣躍以爲自此可免糧解之苦矣不料官解僅屬虛名仍着糧長買解需索益多使費愈增連次駁問重派里甲種種賠累萬分難支產盡鬻及妻子族逃累及親朋斯民又安得不激變也今欲杜前弊拔本塞源無如官織官解一法其便有八徵銀解府給發不致扣減價足則絹好一便也照式織造長短濶狹不致參差二便也督催遲速唯命起解不致愆期三便也是官織卽是官解美惡不致推卸四便也途次有勘合保送不慮竊盜盤阻五便也官役自相照看不致低惡抵

請禁採買柴炭疏

國朝御史

蔣鳴梧

題爲臣鄉水災堪憫懇祈

皇上賑恤以拯羣黎事臣閱邸報見有浙督臣李之芳題爲彙報水災一疏內稱杭紹湖金衢嚴諸處同時被災齊聲呼籲有稱大塘冲坍禾苗罄遭湮沒者有稱昌擊各處男婦盡皆赤足搭桴代渡環泣求賑者有稱四野田禾根株盡爛播種業已過時秧種總無覓處者有稱惡蛟爲害裂地頽山人民廬舍多赴波濤者臣切念臣鄉自十三年耿逆叛亂以來供應煩苦倍于他省方幸騷驛甫定耕作漸興今又值此

異常水災禾苗荳麥竟付東流老幼子女托棲無所
本年之輸將未知作何出產數郡之流亡又未知作
何安輯也然在本年正賦此際必已征比全完惟是
來歲二十二年分稅糧若正月開征窮民萬難措辦
乞

皇上軫念災黎寬其征比

勅部展限于五月麥熟之後催辦正供不過稍緩數
月之期民力得以轉輸而

國課亦不敢遲悞其各地方坍沒田地不知凡幾仰
祈

換六便也府佐上納京棍不敢嚇索七便也往
銷不煩比較八便也有此八便上年鄉紳士民已具
呈撫按今趙繼鼎疏來亦稱官織官解另疏具奏知
事在必行矣但傳聞府縣胥役貪婪不已不得逞慾
于此又思取償于彼議增絹價增盤費分外多餘預
圖侵沒頓欲於原額絹墊每疋九錢二分六厘之外
再增三錢之數概於合縣田畝均派是大戶幸免糧
解之累小民反受加派之苦昔暗扣而今明增其弊
害更不可言卽方擬申詳未奉允行然一時駭聽人
心洶洶恐又爲淳邑之續懇勅戶部速行釐飭官織

官解既久奉明旨萬勿仍累糧解并勿多派小民斯
織事定而衆心安矣然承上達下正已率屬實實
行全在郡守大法小廉故官民咸得相安于無事今
自天啓五年以後不知何故選授者皆日暮途窮之
輩十年于茲無一自愛愛民者各屬邑尤而效之彈
壓無聞剝削日甚遂致釀成大變以有今日若非亟
得一廉能府正予以表率僚屬攝服士民陋規必不
能除亂民必不能安將來不知所終矣伏祈并勅吏
部查酌遞補此尤端本澄源致治弭亂之大竅要也
臣情關身家激切瀆陳統祈聖明採納施行

勅下督撫諭令各屬嚴加踏勘爲之酌量開除其
民之被災流亡者併設法賑濟招徠復業至若十三
年以後所增煙酒稅契等項爲數無多并祈

皇上下沛深仁凡被災之處槩爲豁免嗷嗷窮黎咸
有裨益也抑杭紹湖六府唯嚴郡最稱疲瘠山多田
少民間所藉以輸稅者惟柴炭是賴祈

勅督撫嚴禁營弁等類不得借端強派以滋民累則
瘠郡疲民益戴

皇恩于無窮矣如果

臣

言可採伏祈

睿鑒施行

序文

經界圖序

宋建德令

潛說友

紹興經界距淳熙未久圖籍已多散失且嘗詔漕臣督州縣補葺之則自淳熙至今日其弊又可知已豪右詭名規避姦胥舞文變易賦額銷蝕豈惟嚴陵哉寶祐戊午版曹始用舊額徵諸郡太守告院謝公諭于衆曰有土此有財固也泛以舊額責之縣則產去稅存者其奚堪毋已則按經界之舊而修明之乎亟聞于上玉音俞之說友學製附庸奉行唯謹遂詢命謀賓鄉望嚴選任曾不朞月而九鄉二十一都各以

其籍來上迺視鄉分廣狹計物力多寡裁其溢而豐
其虧因其輕而革其重不底于均不止于是舊額而
損新征頓輕義役成規籍以息民詞科買均配籍以
應上命宿奸老蠹既爲之風灑雪滌而數十年之苦
于白輸者脫然如沉疴去體聖君賢太守之賜不其
大哉既成父老請以等則錄諸梓俾勿壞用畧叙其
梗槩朱文公曰三十年一番經界方爲至哉言乎潤
澤而推廣之尙有望于來者

重築東西湖壩序

國朝行人司 何士錦 邑人

嚴城方九里扼山川之勝枕龍岡而目兩峯挿天
東西湖迴環左右築堤引水逆流而西宋地師吳
鸞所謂腰帶水明青溪令吳天洪所云復引東湖上
御街是也曩魏科顯仕六邑繽紛最著者如文毅三
元文敏解會科名事業炳耀千古明萬歷四十五年
太守華敦復濬湖而深之開府秉鈞掌省司銓前後
踵出不可謂非兩湖毓秀所致也哉
大清鼎興諸名勝猶存而兩壩崩隳水分八字三十
年間科第罕繼前哲筮仕未膺崇秩豈其有如形家
所謂地脉未脩故人文不振歟歲壬子余以行人假
歸督兒輩與同學諸子相爲砥礪見諸子磊落多英

私心竊喜期是科必有奪魁解者及試畢榜發六邑
仍然敗北余始疑人文不振由地脉不脩之說未可
盡非也爰進諸子于庭而商確之諸子慚垂翅于回
谿思澗池之奮翼首建脩壩通湖議余乃額之郡守
梁公邑尹項公咸喜溢顏色捐俸爲士民倡余與各
紳亦相率鼓舞諸子乃先樂輸且持簿勸募凡我郡
中輸粟輸金者悉銖斂錙收共勩厥美經始于壬子
季冬垂成于癸丑季春甫三月而兩壩告竣數十年
淤塞一旦開通時卽有馬君天選王君齡昌之捷適
符其會焉而形家之說幾令人欲不信而不可得者

然余思之人文與地脉各操其柄有志之士以人
地不以地靈人嗣有繼馬君王君而起者炳蔚未艾
行將姚商事業復見於今日此余與諸子砥礪初心
也若徒乞靈于山川則引東湖上鄧街未嘗預爲馬
君王君卜也奚必獨鍾靈于二君哉爰書其顛末勒
于貞珉以爲後來有志者勸

郡守王公光鼎德政序

國朝知縣

張允美

邑人

昔年叔子出而峴首之碑墮人涕淚韓昌黎歿而惡
谿之鱷猶懼風雷是何也一則德澤加于民而民感
之者深也則精誠格于天而天助之者疾也今於我

郡侯王公復地之方公之守睦陵也自始迄終纔九
閱月耳教養兼舉賑卹頻施由是士安于庠而興追
琢之思農安于野而享耕鑿之樂工安于技而無濫
巧之尚商賈安于市而瞻輻輳之盛且也片言斷獄
而鼠雀訟消三尺繩奸而豺狼跡遠合四民而同遊
化日之下統一郡而悉臻隆古之風善政仁心不能
枚數如公所錄二十事蓋其最著者也然公之生也
爲民而切其勤勞公之亡也亦爲民而喪其軀命夫
早寇爲災生民之禍公則視民猶己必親歷窮岩之
巔力行步禱遂至疾不可爲卽易箚之頃獨以斯民

爲念無一語計及身家則公之亡實有愈思而愈痛
者諸人士莫不慘愴號呼曰胡以我二三小民故乃
累公至是爰謀所以報公德者相率詣臺司乞請旌
揚而以此二十事求達

天聰異藏于金匱石室爲將來史乘家所採焉且夫
撫字憂勤廉明仁愛代或問有其人至剪除異類如
狐梟之潛踪則非正人端士惻忱可對天地者莫之
能爲若乃世各其人人各異心而一語及公卽泣數
行下若出一心焉又豈勉強之所能致耶則公之厚
澤深仁固淪肌浹髓而精誠直可格天矣如是而且

崇祀報功誕靈錫祉從此萬年廟食永庇睦陵者正
未有艾也是爲序

碑記

知縣題名記

宋建德令 余植

綠車青節腓土葦茅紅旆碧油建旄授鉞嚴陵其三
聖之始基平面受二江背負一龍謳歌滿城密依治
鎮建德其六邑之冠冕乎然則縮銅章紆墨綬爲邑
長於斯者是不可以無紀也植學製來此竊謂當今
天下每歎無可爲之邑正以賦輸不均催驅良難幸
而粗可展布又不當忘其所自來遂由寶祐令君京
尹戶侍潛公而下乃爲一碑蓋公之爲是邦也約供
上之出均田賦之所入一毫不求多於民民至公

利順之而宰亦藉是多滿去庸冠首刻敬詔方來使
後之縣大夫無忘公意相與守之則是名也流芳垂
榮何啻千百季

建德縣進士登科記

余植

國朝以人文化天下進士得人最盛新定郡自咸平
三年由鄉貢擢進士第首於淳邑得王君冕自是舉
不絕書名鉅相望惟斯邑爲盛豈非千峯聳翠雙湍
瀉玉瑰奇特傑之觀瀟灑清絕之氣獨萃斯邑乎又
得非田范張呂泓宏演迤之學仁義道德之化首覃
及斯邑乎至如抗直節於東都圯極之餘倡洛學於

火德再炎之始又皆斯邑之景星鳳凰光絢宇宙咸
由科目進者也今天子卽位之元年詔陞藩府遂以
邑名其郡每四年上御集英親策方內之士植適以
墨綬學製斯邑未嚙第先默有感焉果而邑人首以
恩貢掇第應益彰也是年斯邑合得四人其三皆比
居於城視他人尤盛顧瞻邑蠻自咸平迄今獨未有
題名以揭斯邑之偉觀殆非所以表列前修興起斯
文者也植茲幸書滿輒採舊聞攻石而書之斯邑士
氣夙醇文風寢盛方來者尚源源也且闕以俟續書
俾後之觀者自其登名以要其遠業之所到知斯邑

建德縣志 卷之九
有人如此則是記豈徒然哉

救荒記

宋進士 黃宗仁 淳邑

士大夫有民有社得常相安於豐年樂歲間非至幸歟天運靡常凶饑代有載考史籍賑乏者亦多術矣大畧不過發公廩致販商分私積皆因其有爾苟無焉計安出哉山多田少吾郡為甚建邑為尤甚歲登甲戶無餘粟中產不足伏臘農可知已仰於鄰邑仰於鄰郡樵蘇而仰於京師小歉則直倍他土勢也然射利者趨之民猶免於孳咸淳二年丙寅夏水易陵谷米幾而旱方數千里凡建民所仰之地率自救弗

嗷顆粒無從至明年春乃擣烏昧採蕪菁至又屑山木之膚以為食形鵠載塗令尹信安趙公與檳戚戚不遑寧曰民饑乃爾發廩平曰無招商乎曰無勸分乎曰無幾束手矣幸先是朝廷科糶豐儲倉米於郡乃捐俸回糶二百斛率鄉都哀助以濟疾苦矜獨之不聊生者又曰濟有限也則貸楮為之祈哀請命乞糶於朝忱辭感動廟堂惻然興憫仍撥豐儲米一萬斛優其直以賑之暨至曲防諄戒無勺合不粒饑民之腹迄事而麥已秋田里翕然舉首加額曰恩哉尹之生我民也異乎彼之因其有者矣鄉之任事者有

黃君炳文謀於衆時同被委者徐夢得李子奇喻子
勳何權何自敬何一之蔣開張大明唐景堯許汝弼
方蘭孫許萬鍾洪榮祖洪友龍劉光祖倪在鈞邵大
中徐安國馮應得錢東陳大林周文中陳化龍葉英
發洪奎英凡二十有六人曰尹真無負新天子撫字
之寄者其事視古人爲尤難將紀以示民之不能忘
忽郡卒騷動火民居連譙犴城且傾動尹一言帖然
以居未幾特旨就擢貳郡衆益歎服曰此豈聲音笑
貌能爲哉乃敘其顛末屬於余余昨守尹之鄉聞其
先君靜齋德祿皆崇倣文正范公遺意創義田以馴
族之貧冠婚喪葬給有差里或饑賑施無靳色尹善
繼有加焉感而服者衆矣故其鄉民兩弄兵皆相戒
不忍犯宜政行斯邑若是卓卓也積而大之豈止一
鄉一邑蒙其澤哉於是乎書

重修烏龍王廣濟廟記

明郡守 李德恢

今上龍飛之二年歲在戊申予承命來守睦州任三
日例謁境內應祀神祇吏以烏龍王具呈爲應謁祠
宇予初以典籍不載心竊疑之吏與耆老構以烏龍
王之顯於唐盛於宋而祈禱屢應之實爲告予聞其
說固未之信歲在庚戌夏六月大旱民困極予率僚

屬徒步迎神以禱甫及市而密雲四布須臾雷雨大作予與僚屬冠裳盡濡明日再雨又明日再雨是歲大熟予猶以爲一時偶然未之深信今年夏又大旱且蝕苗欲死民困尤甚予率僚屬遍謁境內神祇莫之應復迎烏龍神於市素服免冠徒步未幾而四境卽雨旣則本境大雨俄頃間六邑之苗槁者蘇蟲者茂困者起而歲不告凶老稚男女皆謂神之靈所致予至是未敢決信而亦不敢以不信焉載考郡志神昔爲士隱於烏龍山以建白爲令所斃沒後報於令者甚顯且怪郡人因以祀之其建英靈正直之性與

烏龍山峻層礪砢之氣化而爲一乎又蘇子所謂在天爲星辰在地爲河岳幽則爲鬼神而明則復爲人者乎不然何其亘古今越宇宙而靈異無禱不應耶歲旣熟民以神之力無可酬必修其殿宇新其廟貌而後可以申其報祀之意懇以爲請予然之衆歡趨之不逾旬而積金穀若干甫三月而告成葺其事者請予言勒石以垂不朽予不敏姑述此以識歲月云

卯巽二峯建塔記

明總制 胡宗憲

地理之說有諸曰仰觀俯察而知幽明之故其理蓋具於易焉後世堪輿家往往沿其理以神其說而卒

亦未嘗不驗爲嚴之說者曰卯巽二峯重建塔狀元
從此冠羣英蓋嚴以烏龍爲鎮峻層雄峙盤踞百餘
里折而東雙峯矗起是爲卯方其馬目山蜿蜒自西
南來昂伏攢蹙駐於南山是爲巽方徽發二水紆徐
縈廻繞卯巽而東之卯於先天卦位爲離離巽相薄
二塔並聳則形勢全而靈光煥其文明之象乎是故
宋自淳熙間詹公駿以文學魁天下而方蛟峯先生
遂繼響焉明興商素菴先生自賓貢上春官對大廷
皆哀然爲多士魁三元之名重天下迄今文物不殊
科策若縮議者咸談於二塔之圮嘉靖丙午方作文

峰俞公以致政家居乃謀於士民圖重建士民咸
欣欣然戶相裒以協役旣而以其故告諸藩臬守令
亦靡不慨然出贖金以佐之卯塔經始於丁未之元
日告成於戊申五月越六日辛未巽峯復肇工拓基
程物計日亦可底績萃淑迓休斯其一占矣適予以
事至嚴俞公乃率郡縣庠生馬致通王子元張世華
俞貢俞淳等具疏再拜徵記於予辭弗獲乃進諸生
而告之曰天之道盡之於地矣地之道盡之於人矣
予往集諸生而試其文率布體摛華敷腴有則輒歎
其爲山川之秀治世之徵也卽雖鬱然若縮能弗有

待而興今夫榷柟松柏之產也栽培畜結澍之雨露
累之歲月而後明堂之棟清廟之楹出焉其積久故
其用可宏也自素菴以來風氣凝積已有年厚儲秀
發不占可知奚俟於建塔而驗耶夫建塔之驗未驗
不可測而文峯之心則甚盛人情感斯興期斯後有
所諉斯怠塔之記夫猶可諉也塔之建夫將何以副
乃父兄之所期也感於中惕於慮將日趨於勤以期
宏所用機動而事起人勝而天定振三元之芳聲者
自彬彬然踵相接矣雖然狀元之榮榮以人也而克
盡其元爲難元也者天之德善之長也人人有於已

耳知行並進內外一誠可上可下而且能以美利利
天下體元之至也是故講道石峽在蛟峯不爲約訐
謨館閣在素菴不爲泰皆能以其身幹萬世之元氣
而不徒以狀元後一時之溫飽典刑豈遠乎哉若乃
志之怠焉而妄意於杳冥及數之我值也而改錯於
阿徇是自棄其元者也豈惟殞前修之光抑亦貽山
靈之誚爾諸生其念之哉俞公率諸生咸再拜謝曰
命之矣謹記

重修西湖記

明知縣 柳本泰 邑人

嚴州西湖始見於唐書方干集而詳於宋史靖康景

定之間作者具載郡志歷元潰廢已久皇明修復則
自藩參廬陵張公始嘉靖癸亥公旬宣於嚴廣詢民
俗銳志復古與前守嘉定張公協謀堤堰此湖以完
風氣湖駸深而嚴之俗駸美矣民且永賴前人紀於
寶華洲備矣然自癸亥逮今甫踰一紀而湖之決者
再豈與廢有時抑初作之未良於址耶慨今甲戌四
時霑潦而春夏爲甚烏龍諸山萬壑爭流皆下於湖
一時衝激壩遂不支悉蕩露剝澁嚴之舊勝索然沮
矣太守臨川陳公目擊其壞而隱其靈淑之不收也
諭於同寅二守林公三守潘公節推周公咸曰事關

形勝政體攸存茲役良不可已也廣諮於建德尹朱
君兩校師弟暨耆德完民詢謀僉同舉以告巡道僉
憲王公喜聞其事出郊周覽報曰此邦之巨浸山川
之奧區也可無作歟遂捐金若干以爲備直太守乃
屬其耆老而告之曰事萃於人心之同而工舉於時
利之細不有以處之是爲厲民厲民吾不爲也於是
別五材之產乘三農之隙則又曰某石於某川某木
於某山某土於某丘某編於某竹某鐵於某爐皆分
家之遺利不煩內帑之積也某董若干役又某董若
干役又某統攝若干役考其工勤時其廩餼直以在

官曠役之餘費不煩徒役之苦也今者日資三守提
其綱公則旬一課之經始於是年十一月之吉迄次
年春初而厥功告成考其壩視舊進徙若干丈得墜
址廣若干丈兩岸無疎土沿堤培築高厚樹以檉柳
內外盤錯較昔有加而功垂於悠久矣舊時西湖專
主聚秀未察城中基土高仰秋冬則取汲於圍外至
有新水價之語湖成有餘潤矣可一端盡耶公以名
侍御來守嚴郡政難縷舉湖堤其最著者於是教授
凌君文瑛教諭劉君伯潮走幣以其諸生來問記泰
曰粵自唐宋迄今載紀華藻湖之休奕覃矣曷假予

言願生長是邦山川攸賴所企願于湖之成者則然
耳茲役也王公秉憲于上飭此湖之終始諸寮吏協
贊于下適觀厥成例皆得書王公名謨直隸潁川人
壬戌進士陳公名文煥林公名休俱乙丑進士潘公
名絲恩選貢士周公名憲辛未進士餘悉勤于左方
新建縣橋記
明 王士性

新宇俞侯爲壽昌令又明年以才改建德建德治故
湫隘錯於闐闐治前有溝東注而甃頽圯積危圯矣
侯捐廩金新縣治闢溝爲池池若干步圍其南而規
橋其上費不及氓庶而規模稱宏遠焉橋旣成大期

而侯拜命貳括蒼邑耆庶棠蔕厥橋伐石而役言于
余余惟建德於嚴陵爲附邑且介甌欵之衝長吏奔
走不贍而橋之贍乎其才者則又亟遷轉遠廬廳廨
一宿而去耳間有議及者道旁築舍咀唔是懼無能
罷議矣侯乃以撫字之餘除廳事前而治橋邑之黔
赤來工以不日卽無論才識而得民如侯靈沼以後
誰能萬一耶侯治行具遺愛記中代侯者爲甌寧王
公密明習吏事而凜凜德讓其於侯也亦猶南陽召
杜堪輿家以謂人傑於地侯之擢王公之來蓋橋或
與有力云

建試館碑記

明 三應華

余讀子輿氏之言曰士何事曰尙志而知志之爲烈
也大矣是以志存乎致主卽批鱗伏蒲不爲激志存
乎澤民卽救溺拯饑不言勞卒之志成而天下頌之
余奉簡命校士兩浙至嚴陵而如見宋又希公之志
焉其建校士館也人以為公之功余獨以為公之志
志維何曰公昔爲諸生時見督學使者之按茲土也
三載兩試時無試館一切取之民間爲簞爲椽爲木
爲竹爲几爲凳爲麻爲篋老者弱者負者戴者裹糧
而至鱗次而集夏之日揮汗如雨冬之朝手足龜裂

吏徒訶諄罔或恤也用是惻然有動於中以爲校吾
士而困吾民若此也欲白當事者建館焉而時事孔
棘莫之能任喟嗟久之乙卯公登賢書壬戌成進士
遂自謂可以成吾志矣筮仕海虞繼補魏邑埋都亭
之輪秉鳩門之節二十餘年俸之所入貯之匣中以
昇郡邑守令佑值鳩工構材闢土不踰月而崇
北堂廡秩如試事所需罔不畢具昔之擾諸民
則一介不取巷陌之間喜相屬也余來嚴者再登堂
矚目見夫崇隆其制魏煥其觀丹楹刻桷聿然一新
諸文士循序而進彬彬儒雅展雕龍之手舒撥天之

才歎欷然以爲非宋公之功不至此而余則謂是宋
公之志至今日而始成也公前執法臺中忠謨侃侃
時動皇鑒念及桑梓解絹賠苦特疏改折豈非范文
正公所云居廟堂之上則憂其民處江湖之遠則憂
其君此物此志也聖治日新文風日振嚴之士民頌
德無窮將千百禩而如見宋公之志余敢辭一言不
以紀其盛事乎爰拜手而壽之於石

周宣靈王廟碑

國朝郡守 錢廣居

按神周姓繆宣名臨安新城縣太平里人也生宋淳
熙戊申歲三月四日母汪氏夢九龍吐水浴身及覺

建寧縣志 卷之六
異香滿室遂降生焉父名榮母三歲失乳父亦隨逝
神其性孝友事繼母撫二弟備極孝愛初名雄以雄
音鄰榮恐干父諱改名繆宣年二十三見家道不支
母弟無以養棄學就賈携貲客于姑蘇之六沙村設
轄金六金七舍人家三載忽夢母病卽治裝歸金氏
昆弟畱不克隨置椒數斛及抵家母氣將絕對天泣
祝願以身代許肉身燈願母得復痊神少時受仙指
大數四九但默識于心不令母知恐傷母心也一日
母謂神曰婚嫁大禮盍議婚爲宗祧計神以數有所
限婉謝曰兒婚當在三十七早則非宜尋往省脫貨

值省災疫非椒不治粒椒粒金活人數萬未半月黓
回遂身點肉燈以酬前願事畢辭母往衢母仍諭婚
事復以前言對遂將餘貲分兩弟竟抵衢寓武源村
販木歷四春秋發木抵杭值火災木倍售遂携金回
家省視爲兩弟治田庄數處自此家道充盈家居半
載忽辭母復欲客衢母詢歸期踉對曰此去恐歸期
不可預定乃囑兩弟善奉母畱戀悽惻遂復之武源
置木適三衢不雨山澗斷流往土祗廟求卜不得拂
衣而出忽回視見泥神隨後以手相招神心動知數
止此矣欲急回見母乃舍舟而徒至鷓鴣灘失足墮

水頃刻巨浪層翻猛若蛟龍起伏神卽脫化溯波而上至衢城水亭門外浮沉不定有識者曰此臨安周郎也少有異徵果能上感天心下垂昭應當分別香臭各三日語畢馨聞數十里閱三日而香者臭矣一時驚異建廟塑像崇祀于衢城之西有童子二人願捨身從侍舟子胡伯二亦身殉焉同享廟祀臨安有客衢者歸悉其狀于母母奔衢詣廟祝曰果係吾兒當不受拜欲下拜膝未抵地而法身起立手指皆豎頭卽左顧宛若日不忍視狀母扶櫬歸不移晷已抵新城構墓于縣西方家塢是年神正三十有六果應

四九之說乃嘉定癸未歲也端平元年大封神得贈廣平侯嘉熙二年國母患乳神卽代作醫人投劑立效帝問姓名神曰我浙西周繆宣也言罷不見帝異之遣使于浙西廉得實嘉其能孝于親忠于國于淳祐元年秋勅封神護國廣平正烈周宣靈王延祐二年睦郡旱潦藉神庇蔭得錫平康士民遂立廟于澄清門內自元歷今卜年三百有奇禦災卹難不可枚舉當

國初鼎革時兵馬莽集嚴民惶惶詣神求卜以決行止所賜籤筭喻以靜安動危之指其信而守于家者


得保故業疑而徙者半受剽掠丙戌三月殘兵拆城
毀屋月光之下見神紅衣金幘在城南往來指顧迨
五月二十八忽傳大兵渡江兵馬奔潰地方保以無
患記云能禦災則祀能捍患則祀神之謂與今嚴郡
士庶建殿祀神之父母以完神純孝心事并以報祐
庇之恩于永久故為記

張文宗建試館內署記

國朝御史 蔣鳴梧 邑人

國家取士之典始于歲科試升于鄉會以至大廷之
對其上者讀中 秘之書儲公輔之器次亦為錢穀兵
刑之吏列宿之臣而州縣之長也其餼于學宮者復

歲貢于朝為師儒董率之職蓋其法皆由于督學之
校士始然較試之人每以一日之間品題數千百牘
等其甲乙而別其妍媸則心勞而神瘁若所居湫隘
則益無以舒暢其襟懷而日操筆弄鉛于瑣窓行墨
之際將所困者在心目而所失者不在人才乎故曰
君子必有游息高暢之區者此也余為童子時見學
使者按部于睦苦無專館以為試所往往借直指之
署臨期蓋紮棚舍為生童坐席之號暑雨寒冰上漏
下濕就試者艱辛萬狀後崇正癸未年鄉先達中丞
又希宋公致政家居慨然捐貲創建試士之館凡門



廡庭堂以及燕居之寢閱文之軒庖厨滷泔之室規模始備繚以周垣防以棘茨而試事始有專司督學按部始有專署然基地買之民間不能強其多售於內署以淺陋爲嫌不特無高暢游息之處至盛暑隆冬幾無以安行李而容僕從此誠有待于後來者矣今張公晴峯之督學吾浙也嚴以課士精以較文兩浙之士沐浴其光華而景行乎山斗者彙所頌詩詞以歌咏之余辱陪臺省逃聞其風化以爲

聖朝命官督學爲取士之始如張公者不誠吾浙之大幸也哉適郵筒南來梓里士大夫以書告余曰張

公視學于睦拔孤寒正文體取士咸彬彬俊彥更以館之後署淺迫狹陋不足以充爽其居乃節俸捐橐與郡伯任公暨六縣明府力勸厥事易館後之民地拓而廣之復爲屋五楹棘闈庀飭軒窓淨雅夫然後試士之館克全其美觀諸紳士將勒之貞珉以無忘公之德余作而喜曰公非徒廣其署而已其謂署既廣則身得以安身安則神清而鑑益以明其所評騰之文與所拔尤之士非確然有用之才乎余向所謂鄉會廷對讀中秘之書而儲公輔之器者莫不出乎其中此吾所厚望于吾鄉之士而吾鄉之士世世視

公于勿替者也公諱衡字晴峯順治辛丑進士直隸景州人

重脩府城隍廟記

何士錦

嘗謂國家祀典所載名山大川之神高城深隍之守及琳宮紺宇盛衰興廢恒與治亂相始終故當兵燹頻仍饑饉交至民人流散井里蕭條爲政者方治師籌餉撫循不暇而暇廟貌之輝煌乎逮

聖天子懷柔以德賢藩牧招徠以恩叛者歸心去者復業斯時父子咸寧重瞻化日然後脩舉廢墜虔其神明易圯壞而維新之以無曠守土之職蓋非有所

禱于神明也前年甲寅春寇起西南繼以閩叛不逞之徒倡爲木虎出山之謠揭竿草澤蹂我邦鄙燬我室廬殲我民人各邑山陬封豕獮而魍魅巢郡民纍纍然入山相保城市幾空大吏聞而憂之選才德上請以睦陵六邑授我郡伯陳公公單車馳任視事畢例謁城隍廟再拜稽首用將誠敬既進父老而言曰斯神也郡倚爲保障也箕風畢雨莫不由之而壁頽垣丹青剝落吾見神靈之不我妥祐矣今日爲爾民保境土爲爾民全家室雖予刺史責而神實其之諸所理葺姑少俟焉于是獎帥士卒躬詣寇壘宣

朝廷威德示以坦懷遂相繼就撫而各縣乃寧然八
露草處者三閱月卽歲除不得休沐正月朔旦
相慶如往歲若不知有兵戎之警者爰從者定之
以建脩城隍廟請于巡憲萬公萬公稱善首捐俸
十金爲創復謀前鎮鮑公協鎮洪公司馬劉公別
趙公六邑賢侯闔郡紳士各助乃貲外其大者公
俸金以主之鳩工庀材子來趨事由門而廡以達於
庭金晶碧瑩炯日耀日大啓寢殿峙以危樓後置佛
閣三楹士夫耆老謂公勤勞無以報德卽其左址闢
地爲堂名曰召懇奉公位祠焉且擬勒石傳之永
而以其辭屬不佞不佞受而紀之曰圖治有序而後
民安民安而後神妥神妥而雨暘時若癘疫不作萬
寶告成疇昔軍興之日民離其居士逸其塾鴻鴈嗷
鳴莫之或恤公之蒞吾郡也先之以撫叛而反側安
次之以鞠育而民生莫終之以建廟而鬼神福于是
知盛衰興廢與治亂相終始而轉亂爲治舉廢爲興
非公其孰能哉故予記廟碑先及吾郡之亂與亂而
復治斯民由化離而重游熙皞皞歲歲擊鼓吹笙刳羊
薦醴迓神庥于罔極者皆公拮据之所致也後之觀
此者贊歎踴躍知公爲國家崇祀典爲嚴陵造福澤乖


諸千萬禩引之而弗替也夫公諱于廷字憲章盛京
滿洲人

重修嚴先生祠堂記

國朝知縣 張雲鶚 邑人

東漢隱君子曰嚴子陵先生嘗披羊裘釣富春大澤
中郡之名嚴實以先生重百里提封直與雙臺左右
共千古焉前明嘉靖間刺史吳公世澤建祠于府治
報恩祠西南萬歷二十三年後守陳公經濟以雜處
闐闐不稱清風乃改創于建安山麓背枕高岡面臨
流水清幽閒曠廟貌惟稱

國朝康熙二年邑宰胡公應華稍為補葺今五十
餘年斷瓦頽垣無復存者太守王公廣益慨然興歎
謂先生守道自高塵海軒冕不但富貴浮雲抑且功
名土芥尙何有于千百年後一椽寸瓦之興廢為哉
然先生脩身學道廉頑立懦卽其流風餘韻猶堪礪
俗磨鈍則俎豆馨香亦百世之人心自不能已爰捐
清俸鳩工庀材不兩月而事竣輪奐規撫視昔較增
董是役者建邑縣佐劉公世正也且構廳後別室三
楹以居守者旁拓行道五尺則王生大仁捐給勸事
從此山高水長人人寤寐嚴先生之高風亮節與今
太守激濁揚清之意豈不與雙臺片石並千古哉



文淵書院碑記

陳

誥

海寧

余往過嚴灘于山見雙石嶽崎于水見十九泉澄碧
于人憑弔嚴子陵方雄飛之高風逸德嗣徽音者理
學儒宗則喻子才方蛟峯文章名世則商文毅姚文
敏皆磊磊明明卓犖千古迄今粹美人文甲於兩浙
意必有大君子相繼休養陶鎔餘澤流風乃以不墜
旣而考志乘漢以前曠遠難稽晉唐以來如任公昉
陸公游杜公牧守斯郡者皆賢哲相繼至宋范希文
游劄龍山書院張敬夫繼設麗澤書院與朱晦菴呂
東萊往復辨難明道講學于茲土宜其文獻蔚然越
今未久衰然龍山真澤兩書院一燬于元初再燼于
明季蕩然無復存者歲己亥我

皇上崇簡內院侍讀吳公來牧郡公下車釐剔一新
百務具舉乃獨埒清雋於府岸東偏建書院一區顏
其坊曰文淵爲廳爲室爲廡爲門後爲庖福宏敞清
潔以率國之秀良物鄉達進士張君雲鶚爲之師風
靡四方負笈接踵科名鵲起文教重興中丞朱公聞
之喜額其堂曰麗澤蓋以南軒先生耦公異其前後
輝映爲國樹人傳世不朽也庚子夏余歸田嚴父老
徵余記余乃慨然追維三代盛時詩書禮樂以造士

念終始典于學尚矣漢世購遺書遺經始出迨
高情談唐人專帖括遺經存而經學終未明藉
發幽何以使吾道如日月經天江河行
地也乎安子新安人與嚴接壤公先世亦新安人爲
延彭明朱子之教于其所麾守之郡吾
乃有其倡者必有和者遇合原非偶然
學者翁其體實太守儲才育德盛意從事淑身經世
遠無徒取一第以博人間富若貴也豈不與山高
小異同承且有烈光也哉公諱昌祚字爾熾三韓人
書院成于己亥鵬月之望日是爲記

重建試館碑記

國朝舉人 宋 溱

嚴陵才藪也向之試館遇歲科兩試皆臨期構殿
時需用則取給于應試之士子人皆病之司土之官
亦病焉自明次司馬宋公爲諸生時卽慨然以刱建
試館爲己任迨歸田後出歷任所積俸貲購地度材
鳩工揆日爲堂爲廡爲廡爲門以至厨庖寢湔犁然
畢備遂爲永制

鼎興以來誼教廣額作人人思濯磨靡不蒸蒸
向風讀書與試者田益衆而向之號舍不能容于是
督學彭公始倡增設之議繼此而王顧兩學使皆有

建德縣志 卷之九
同心事繡未集庚戌歲晉江李公按嚴銳意克拓幸
際郡侯蔣公以芸館詞宗出典山郡其造就人材培
植士類以仰答

當宁作人之思靡所不至遂身任其事會李公赴召
乃詳請制府程公暨學使帥公報曰可因得悉心區
畫上承德意以潰厥成由堂墀號舍及于門闌繚垣
夙向之卑者崇之向之隘者廣之而今而後士之較
藝於斯者伸紙揮毫俾各得盡所長以邀一日之遇
孰非我蔣公之所成就歟由是而知凡地方興舉之
事惟恃乎官斯土者留意整飭則無美不臻袖手悠
優則事幾坐失向者歲久因循何以望道旁之築今
者咄嗟集事遂同不日之成雖時至事起理有固然
銳意整釐誠非其人莫任也則自今以往都人士之
感德而謳思者不且與前人並不朽也哉公諱林字
元楚登乙未進士廣西全州人

重脩湖壩紀畧

宋維藩

嚴陵踞浙上游其脉自天目西迤邐而來星馳雲轟
巍然萃于烏龍蒼莽之間昔人稱錦嶺繡嶺良非虛
語惟是東南下臂無高陵大麓形勢視右尤縮青烏
家以爲缺陷而其中地之震下水之潢瀦亘古今而

不涸者則東西兩湖也宋以前郡城居西偏則兩湖俱在城外自明初改築移出東南三百五十步西湖仍放城外而東湖則在城中且位乎城之左爲一郡之內臂是昔去郡治稍遠今則衛郡治爲最近且切惟其遠在城外無關於地利則東流之水可以不治今切近郡治而爲內臂則東流之水烏可以不治耶故昔人創爲壩以堤之引其水自東而西由小東湖歷太平諸橋出江家塘以達于西湖復倚巖壘石築巨壩以蓄之于是水逆決而上滌涸如帶氣完神固六邑四境以稼則碩以植則茂以民則庶以牧則蕃

而人用是富邦用是阜科名鵲起絃誦不輟他不兵論如三元宰相有明未再屈一指實產于郡治之公街嗣後清太守銳復于興仁門外建文昌閣以爲外臂次年蔡君應龍鄉試魁兩浙前人智慮經營爲地方計至深遠也然究竟下臂不聳包裹不全先中水自常熟艱歸與前輩蔡應龍陳熙廷相其地之所宜于文昌閣前重建八角巍樓以補其不足不數載而前輩柴挺然內秉銓衡先君與前輩汪喬年諸先生同時開府遂邑方逢年大拜鷺鷥盈朝不可謂非風水之明驗也自此以後東湖爲宦園地洩水築

臺而流復東西湖爲細民逐利捉蟹藉口而巨石漸崩明季兵燹之餘更致潰不可收拾地方由是困乏人文亦由是式微

清興科甲雖登奮興難繼或間一二科而舉或間三四科而不舉識者憂之余不肖懼無以繼先志遂創議脩築兩壩與諸同志請于郡守梁公浩然梁公聞而矐之于于是募諸當事及吾邑各紳士庶多寡樂輸共襄勝事尅日鳩工負土輦石不數月而兩壩告成邑侯項公一經捐俸建龍山書院于文昌閣前以培地脈其中博雅堂則余所助建也工始于壬子仲冬

而成于癸丑季春是年馬君天選王君齡昌兩提南宮尋梁郡伯擢寧紹兵憲項公內補銓部協鎮鮑公虎開閩黃巖諸文武仕宦遷陞者不一豈非脩築之有成效歟古人曰盈虛消息廢興之無常將以大有爲也今而後安知三元宰相之不復見于吾郡乎是役也余與何君瑞景總其成同事則兩岸博士陳元銘陳偉器王中錫趙昌祚俞宜杓戴天禧柴喬然魯孔淑蔣徵猷詹麟禧李元煥張翔家維烈殫心襄事耆民則童學孟與有勞焉爰記此以告後之畱心地利者

創建永濟橋募引

宋維藩

建邑西鄉離城十里許有派溪者源從龍山鄉來以達於江至此水多支流故曰派溪以其派也從未有議建橋梁者豈古人之才不今人若耶抑古有行之者今無出攷其興廢耶夫西鄉為八省孔道西通百粵東達京省往來如織非特商旅經行而已乃霖雨則望洋若東西之天限至嚴冬則蹇足苦揭厲之維艱善信憂之茲忽有居士張學者矢願甚宏以募石建橋為請余聞之色喜繼而難之難之者何水性非常則沙石有潰決之患或東築而西穿或此堅而彼

激是細流之可虞一也厥岸濶里許棚以木橋則腐朽不能久支欄以石墩則薄質易於逐浪且易漲易涸是高低之難定一也况時當告置值兵興旁午之候即斂一絲一粟而有所不獲乃千百其鏹而億萬其工雖衆擎易舉恐難觀厥成也居士曰否否水性無定則因其性而導之至泥濘之中立以方厚巨脚如轉轉然是細流之不足虞矣兩岸雖寬其濶多者舖以石埭坦途可行其深而濶者架以條石長丈餘濶厚以尺計是漂墊之無可憂矣至圖不朽之功者不為一時慮盈縮而為千載謀利害即時際窘迫非

豪傑有必勝之才而誠懇有感人之實力於謀始者必善於圖成夫誠之一字可以格天地通鬼神而況此利濟之舉人人樂從者乎願我宰官大夫暨都人士女各隨其量以其襄盛事弗謂一鎰無濟也一錢亦百萬之積弗謂一簣難期也一簣則九仞之基異日輿梁告成民不病涉豈非諸善信至誠之所感以爲人天之勝果歟故弁數言于首以爲樂善者勸

壬戌水患紀實

陳元銘 明經

嚴郡居萬山之中地勢爲最高而往往受水之患者何以故蓋由省會視嚴陵則據浙西之上游而形居

其亢自新安視嚴陵則爲休歛之下臂而形處乎卑此西港水所由來也而南復爲八閩三衢之門戶金華澱江之水盡會於城東二水合而放乎七里之瀧兩山對峙如屏旁無所瀉單懸一線如喉吞不及吐是以逆流而上汎濫懷襄顧或有西港之水而無橫港以阻之則猶未至於浸淫也惟西有奔溢之勢而南復狂瀾澎湃以益其怒如是衝逸排擊之患往往中于城市汎濫民若然其小者不過及階而止大或四五尺或更數歲而一遇從未有如康熙二十一年五月十七夜之水之大且怪也其水迅擊人不及措

手足故曰怪也或曰元至正年間洪水橫流指拱辰
門外石亭以爲証而碑文磨滅多不可攷惟明天啓
元年辛酉大水四年甲子又大水居民于世柱史坊
上兩題其處曰天啓某年某月水至此今其迹尙有
存者茲則過原刻字處直平石坊橫梁矣右營都司
馬君復刻石以記噫此一水也北至府治麗譙下而
東西與南則無地非水也水勢洶湧人心旁皇暴露
乏食或避城上或避縣學署以及高阜處而避府城
隍廟者爲最多始於十七退於二十一日上而城郭
公署崩頽下而民居廬舍傾圮若城外沿溪一帶漂
沒不可僕數至四鄉衝壞田地碾碣徙蕩古穴橫
更有不忍言者噫此甲子後未有之天災也洪水甫
退復有六月初大於斯水之謠果於六月初一日霪
雨連綿至初五則自辰至午晨昏不辨水勢洶湧似
倍於前而人心旁皇亦倍于前居民褰裳跣足而求
避亦更倍于前嗚呼痛定思痛情已不堪况復痛乎
幸郡伯任公編筏救溺煮粥療饑且平糶以便民至
次年秋熟乃止又邑侯戚公爲民請命申詳各憲繪
圖入告俾士民實沾

朝廷蠲租之惠者郡邑大夫力也夫水天下之大利

大害也聚之則爲害散之則爲利畏之則爲害資之則爲利而嚴陵斗大一城山潦驟至易盈易涸聚之無可聚散之無可散畏之則疾如仇讐資之則求而弗得未可與東南水利可以疏濬可以渟滯可以灌溉者同年而語也是在畱心民社者求其瘼救其災審其所患恤其所無斯有大利而無小害耳且從來未有一歲兩次大水入城者宋形家吳景鸞記云一年兩水進城須防火盜而橫港直冲東館似乎吳水上堂記云卯巽二方重建塔狀元從此冠羣英今雖未能建塔而吳水上冲亦文明之象也將來必有瑞應記以爲驗云

重脩建德縣學記

學校所以儲才也人才之興因乎倡導苟畱心學校而整理以時乃所以爲

朝廷樹人之計至深遠也然非蒞于茲者意屬於斯往往因循苟且鮮有毅然獨任者我建邑學宮之遷於建安山也始於前明隆慶間郡守周公以青烏之術舍舊圖新其爲殿廡堂齋櫺星戟門各如其制善政民思至今流芳俎豆百數十年我

朝文教日隆脩舉數四其最著者若項公一經夏公

景松薛公景珏皆克繼前賢完其朽撓越今廿載日
就陋壤我胡公下車後凡諸廢墜次第具舉而以脩
葺學宮爲首政乃進二三老成士經營籌度審勢量
材謂非大爲整理之不能經久遠而所費不貲難以
集事乃捐輸不足悉取資於公之俸金工遂以竣夫
爲令者舉一工興一役

朝廷定議於上諸大吏督成於下而當其財絀於用
勢沮於時方且相視愕眙不勝却顧孰肯毅然獨任
爲人所不能爲如我公之竭力以訖斯工庶幾周公
後一人矣蓋周公創之胡公整之前後相濟宜吾人

思所以報公者如祀周公焉亦從而祀之嗣今之遊
於庠者莫不敬身勤學以承公之德意斯可以無負
於公也夫公名士圻宇丹書江南蘇州人

重建宣靈廟記

福建鹽法道 吳謙誌 邑人

吾郡之祀 周王也舊矣向聞諸父老曰神之最顯
著者莫如宣威橋之廟蓋今之三元橋卽昔之宣威
橋也以商文毅公大魁天下建坊廟左因易今名前
郡守錢公記云宋延祐二年余郡旱潦藉神庇廕得
錫康平士民遂立廟於此經今五百餘年矣憶余爲
諸生時肄業文淵書院晨夜由茲往來每謂此廟地

乘府治龍脉惜其卑隘者大而新之與西北隅之奎閣遙相對峙不第係一郡觀瞻更足起人文之瑞素有志焉而未逮庚午春余親友沈逢原饒鼎元夏嵩年柴嘉禱陳遐年柴嘉祝焉自張柴武鉦田藍王大朋等十有餘人約同里而謀曰橋梁道路王政之大端祀典神祇立國之大事自前朝岐陽王改築新城斯漸適居郡城孔道且前殿爲朔望宣講

聖諭祈求雨澤之區年遠廟古易更新之四街輿情莫不踴躍各書姓名捐金於簿鳩工庀材越四寒暑至癸酉訖工更購民舍創偏殿於廟側以爲官廳客

座高閣周建長廊四起昔之所謂隘者廣矣卑者崇矣閭汶者軒豁矣樸陋者丹雘矣四方人士咸稱斯廟爲合郡冠余宦繫於閩不獲躬任其勞心喜夙昔未酬之志得同事而力新之俾華彩煥爛孔安且固是神之宣靈于吾郡者歷久彌顯而廟貌之鼎新于此日者昭事惟虔用捐俸金以勸盛舉至于神之生而孝友沒顯忠靈護國佑民禦災捍患悉載錢碑無庸余記

留耕莊記

陳熙績 明經

吾嚴山高水長形勝爲浙東冠子陵吳喜輩率皆寄

建德縣志 卷之九
跡於此自唐杜牧有溪山最可憐之句是以往來者
多流覽不置云而城南之棋枰山爲更勝山下石壁
巖然俯瞰大江漁舟如鴨翼比泳游旅客風帆下上
不絕其對涯爲白鳩鄉予先人結茆屋數楹於斯
日畱耕後圃有竹若屏予每披荆露石坐卧其間
瀝竹風煩襟頓洗因就竹徑之北構數椽狀如小
東望平疇數頃麥浪禾風勢欲浮屋別有一點蒼翠
巖案間則橘山之橫其東北也凭欄左顧隣家松
竹與宅畔蕉柳鬱然相接由軒而南築小閣閣外梅
數一本花色相間踈影暗香不數孤山庾嶺爾時登

高俯眺恍有出塵之想梅花盡處則夭桃文杏薔薇
月季芍藥海棠之屬互相掩映按候著花自可當山
中歷也近砌繚以周垣規其隙翼然而亭亭畔有池
池蓄游鱗當荷淨納涼作碧筩飲興復不淺若夫玉
蓉含露籬菊報秋又爲築場納稼時助一爽致云至
嚴寒木落滕六飛花策蹇刺船隨意所適莊中四時
之景大畧如是居山中惟與騷人逸士相往還花晨
月夕野藪村釀一斗醉一石亦醉也客有知音者令
小奚絲竹和之花影杯前松風杖底亦足佐耳輪供
養更作一釣艇每遇風清月朗半載琴書兼攜花醞

鼓楫于石壁上下回顧山莊林陰鳥聲另具一天景色興盡而返則闔門高卧如置身於羲皇世矣嗟乎河陽金谷予薄其奢清夜齒園予非其匹唯是因地隨時陶情於山水花木之間以銷磨歲月何復問人間世哉偶得餘暇則與田夫野叟涼竹簟之暑風曝茆簷之冬日以無負我先人遺業是則畱耕之意也若謂放情山水欲追踪於子陵吳喜輩則吾豈敢

詩

五言古詩

七里瀨

宋謝靈運

羈心積秋晨晨起展游眺孤客傷逝湍徒旅苦奔峭石淺水潺湲日落山照耀荒林紛沃若哀禽相叫嘯遭物悼遷斥存期得要妙既秉上皇心豈屑末代誚目覩嚴子瀨想屬任公釣誰謂古今殊異代可同調
過新安江貽京邑遊好
梁沈約
眷言訪舟客茲川信可珍洞澈隨深淺皎鏡無冬春千仞寫喬樹百丈見游鱗滄浪有時濁清濟涸無津

豈若乘斯去俯映石磷磷紛吾隔囂滓寧假濯衣巾
願以潺湲水霑君纓上塵

游雲居菴

國朝 宋維藩

寺出雲霄外一山復一水山在踈樾中水流遠浦裏
我來耽正壑辭囂採芳芷時時傍澗行臨淵歎洗耳
間亦溯蒹葭悠然歌彼美篠迴風條條煙沈波瀾瀾
豈唯地境幽僧人更樸鄙探幽憇山巔旌陽魯至止
丹爐火正紅玉京降尺紙招彼騎龍君飄飄登帝尻
迄今已千年白鹿畱遺趾旁有聖水潭其水清且泚
旱則爲甘澍我農獲休祉幽賞轉徘徊企懷惟石髓

胥村山莊

馬天選

黃雀喧遺穗吹香滿野扉籬菊靜可愛踟躕夕陽微
彼此互命酌紫蟹鮮而肥秋來果亦好梨栗羅四圍
酒行不苦苛宴笑無是非坐深風色緊言歸納絮衣

舟過烏石灘

俞 珮 錢唐人 州丞

潏潏巖灘下鳥石如覆釜不知何年生突兀自今古
雨後有微苔水急無纖土商船不得上男婦竭篙楫
我來日已曠月黑疑伏虎乘醉彎弓射力盡不沒弩
李廣倘難封嗟子更何取

七里灘

宋 楠

峴江折而西灘惡港名溜長灘分上下步步強弩設
灘盡始入瀧沉沉井底甃古藤絡巉巖陰崖失晴晝
山如劈斧皴水作青羅縐巨靈伸兩拳拔地轟奇秀
東臺勢崿岬心角互鈎鬪破中出石筍尋丈不可究
西臺勢輪囷俯入坤軸厚石理橫界斷重叠兩碁覆
兩臺峙江心積鐵古苔繡其旁出孤松附石並堅瘦
千年飽風霜歲久益偃偻高高歷星漢趨趨落猿狖
陰陰雲木合瑟瑟風簫奏團團網罟集隱隱帆檣轉
潏潏魚自跳嚶嚶鳥初擊鱗鱗丁下屋隻隻路旁堞
依依煙霧橫晶晶砂石採丁丁響樵斧濺濺鳴乳竇

朝昏各變態光景難刻鏤我生山水窟還行此中舊
翻以屢經過妙境眼前漏竭來向風塵僕僕牛馬走
燕南趙北際所見多樸陋歸來眼忽明乃有此佳觀
近復客吳閩好山日邂逅丹青粉本摹僅可稱苑囿
寧知奧區固造物窮結構舉手謝山靈形骸媿塵垢
微吟向清流吾齒或可漱

七言古

七里灘送李康成赴江東

唐 劉長卿

潺湲子陵灘髣髴如在目七里人已非千年水空綠
新安江上孤帆遠應逐楓林千萬轉古臺落日共蕭

修寒水無波共清淺臺上漁竿不復持却令猿鳥向
人悲灘聲山翠至今在遲爾行舟晚泊時

羅浮仙橋

國朝 戴玉綸

睦陵古稱高隱地東望雙臺挿天翠又有南山峰最
奇嵯峨突兀人罕至相傳昔日仙人若一聲長笛雲
滿廬隨風飄墮枰子落洞庭霜後紅不如于今世隔
幾千載何處桑田不滄海仙人已去橋亦亡城頭明
月終無改我聞羅浮斗大梅寒宵化作美人來金丹
石髓能換骨料應此橋非凡胎星槎權使采風至欲
辨羅浮僞與真譬如熟讀桃源記野水迷漫莫問津

瀧中吟

朱彝尊

秀水人

瀧中行不知遠雨初消雲乍卷藥苗長蒲葉短一夫
牽船九折坂纜逾急舟逾緩前峰合後峰開一曲轉
一曲迴密樹重重暗飛泉處處來人家三五居瀧裏
半是樵夫半漁子又白魚捕烏鬼釣車釣輪滿沙觜
黃白花開照瀧水未必他鄉能有此瀧中吟子歌不
足我嗣音

舟次富春江

嵇宗孟

杭州人

雨後春山生曉霧玉露濕衣不忍去洞口花深虎豹
閒應有仙人笑孤樹我來醉卧沙棠舟擁被看山青

兩眸當船雙鶴亦解意叫破白雲山上頭

壬戌水災紀事

李用勤

嗟維歲次日壬戌夏五兼旬月離畢傾盆疾雨撼風
雷浩浩懷襄堯舜日庚辰猶未戰支祁河伯天吳得
意時兩江銀浪如山立排城入市魚遊墀晉陽三版
豈云病干雉而今牛已穿乾坤震動陵谷移蛟蜃烈
翔嶺巔橫矮屋隨波大厦歆崩垣沉壁家家悲人民
逃水如逃寇纍纍挈妻并挈兒更有倉皇奔靡及慘
向洪濤作腐屍饑鳥啞啞枝上叫湍頭羣集啄腸胼
高田卑隰皆湮沒禾葉爛死禾根披無論此日傷滿

日最苦終年失民依且聞當其衝激處石骨峻嶮
相鏽平原膏壤忽成溪萬衆吞聲不忍覩畦中蔬菜
無一存冷樹空餘數畝園既歎薪如桂還憐米似璫
眼前艱尙爾秋冬胡可言吁嗟乎微官愧乏廻天力
午夜徒勞請命思當道已上鄭俠繪 帝庭頌賑拯
窮黎

夏日從郡伯任公登烏龍山禱雨

唐 烱

睦州之山曰烏龍大峰小峰環相從青嶂插天數十
里白雲往來無定踪旌陽許君曾憇此丹竈火氣通

玉宮蘿荔交枝結竒窟龍蛇出沒藏蒙茸六月旱乾
千里赤山色靄靄摩青空其露垂珠能作雨所禱必
應有神功我來夜半坐山麓舉首極望眼朦朧九迴
屈曲層巒去猿啼夾道起陰風幾處細流寫磬石一
徑茅塞繞孤峰隱隱林間聞虎嘯新月不明路不通
濃露濕衣冷侵骨攀藤欲絕力欲窮此時心膽俱盡
落忽聞樹裏發晨鐘昔年曾登泰岱巔羊腸百轉路
千重今日巍峩氣象壯何須專美大夫松扶筇直上
天既白一山復出勢更雄草木蕭疎惟鳥道龍池惟
石排籠窺任公到此誠未竭烈日下拜祈蒼穹賢侯
愛民不避險會看四野陰雲濃

五言律

送睦州孫沅自本州却歸句章新營所居

唐劉長卿

故里歸成客新家去未安詩書滿蝸壁征稅及漁竿
火種山田薄星居海島寒憐君不得意步步別離難

送張翊之睦州

舊任建德令

前人

遙憶新安舊扁舟復却還淺深看水石來往逐雲山
入縣餘花在過門故柳閒東征隨子去偕隱薜蘿間

睦州

杜牧

州在釣臺邊溪山實可憐有家皆掩映無處不潺湲
好樹鳴幽鳥晴樓入野烟殘春杜陵客中酒落花前
新安江行 章八元

江源南去遠野服暫維梢古樹懸魚網空林見鳥巢
雪晴山脊現沙淺浪痕交自笑無媒者逢人作解嘲

至七里灘

李嘉祐

遷客投於越臨江淚滿衣獨隨流水去轉覺故人稀
萬水迎秋序千峰駐晚暉行舟猶未已惆悵暮潮歸

建德路

元 鄭善夫

小艇清江並孤城碧嶂防土宜多竹柏民業但耕桑
稻熟元官早山深伐木長經過數州郡淳樸見茲鄉

嚴州晚泊

明 汪希茂

東館維舟日微風浪乍生渚雲低斷岬煙柳暗孤城
僮僕酤村酒舟人話水程故鄉飛鳥外翹首不勝情

泊新安江

唐 仲賢 郡守

信道新安水常看澈底清山迴流欲斷烟霽石逾明
崑樹蒸雲濕沙鷗浴日晴停舟無限意何日盪塵纓

七里瀨

國朝 戚延裔 縣令

潺潺七里瀨泛泛一經過白鳥飛無盡青山此更多
危崖爭繫纜小艇但隨波獨羨垂綸客優游卧綠蓑

黃浦漁燈

張允美

一帆依斚落暝色入岩阿客思秋增爽騷情夜較多
棲遲鷗夢穩嘹唳鴈聲過隔浦窺漁火星星點碧波

夜集淡圃遇雨

宋 鈺

不堪永夜雨難作月中遊荒草迷山徑閒雲入畫樓
娟娟連翠磴泛泛集虛舟刻燭詩成後清樽話正幽

過烏龍山

馬尹文

秋氣甦行客看山倍有情泉聲沉壑細松韻入雲清
叢竹黃頭聚幽花粉蝶迎霑衣寒雨潤前路日光明

遊寶華洲

得曇字

宋 銍

乘興尋春勝穿雲過佛龕危峰斜映竹曲水近通菴
聽法飯三乘傳經叩二曇坐深情自慙魚影躍澄潭

七言律詩

法華寺

唐 方 干

砌下松顛有鶴棲孤猿亦在鶴邊嘯卧聞雷雨歸巖
早坐覺星辰去地低一徑穿緣應在谷千花掩映似
無蹊是非生地多幽雅此日憑師爲指迷

登龍山絕頂

明 戴廷槐 淳邑令

山色真成五色龍烟霞長護最高峰側身黃道諸天
近回首蒼苔一徑封酒載僧寮春寂寂席臨漁艇晚

重重歸鞭漸促留詩興留取他年仙吏蹤

咏龍山石泉

贈侍郎王
玉泉先生

祝允明

莫仅高岡一脉涵奔騰日夜自無厭縈迴澗壑流偏
冷灌溉松苓味更甜雨淡亂鳴蒼玉珮巒晴忽下水
晶簾主人自是山溪逸時聽涓涓足養恬

寶華洲步楊仲延郡丞韻

國朝
宋維藩

一湖蒼翠護城灣高閣登臨晝掩關涓滴流來曹洞
水雲煙堆出米家山遊魚應解濠間樂舉世誰知竹
裏閒不謂使君多逸興尋詩終日竟忘還

石佛菴步節令孺學博韻

柴爲櫬

非風卽雨惜春歸絕頂山屏繡暮暉禪榻坐深甚局
暖簷花吹向酒船飛萬家煙火愁餽粥一寺香燈飽
蕨薇欲借新詩如鄭繪肯將裘馬耀輕肥

登北高峰

蔣鳴雷

繡嶺千尋俯萬峰迢迢天半起長虹松盤雲磴濤聲
壯門對楓江鑑影空煙靄自浮多寶塔飄飄疑在碧
霞宮何須更上層霄望極目川原落照中

登郡城南樓次毛越千同年韻 詹嗣祿

隨興登臨實壯哉江樓好景共徘徊山懸飛瀑蒸雲
濕春到名花冒雨開二水縱橫縈岍曲雙峰翠嶺擁

城隈閒吟正值斜陽暮樵牧相逢一笑迴

東湖閒眺

詹嗣業

極目城頭水一彎繞隄山色曲如環丹樓翠巘參差
立深柳疎篁杳靄間雲影自隨征雁遠波紋微動野
鷗閒坐深更覺添詩興款乃漁舟任往還

登北高峰次韻

宋 銓

朝乘蠟屐陟蒼真路入松陰一暫停嶺上浮雲常繞
塔寺前衆壑盡環亭晴煙籠柳村村綠新竹搖風箇
箇青江水至今流不盡征帆一一下前汀

過七里瀨

鍾之昇

錢塘人
建陽令

瀨急帆高不易過危峰夾岫鬱嵯峨船頭水霧秋偏
重舵尾寒潮晚更多斷澗風生疑虎豹澄江雨後出
鼉鼉誰堪日暮猶言邁又聽舟人發棹歌

初至建德口號

王 賓

邑令

二水歸朝百雉城枕山翼塢勢崢嶸人尊高節民皆
古邑有淳風政易成驛近敢辭頻負弩地磽且喜盡
勤耕搆家彷彿江東隱管領煙霞足此生

五言絕句

宿建德江

唐 孟浩然

移舟泊煙渚日暮客愁新野曠天低樹江清月近人

送客往睦州

楊凌

水濶尺南天孤舟去渺然驚秋路傍客日暮數聲蟬

洞真觀

宋趙林

不落巖洞冷泉飛玉殿寒棲真無一事清嘯倚闌杆

泊楊溪

明童軒

月色照溪水秋聲起樹間孤舟今夜客無夢到家山

七里瀧

國朝俞作霖

一艇寒江瀨雙臺晚樹風櫓聲猶在耳漁唱夕陽中

七言絕句

西湖四景

宋范純仁

百頃琉璃感翠鱗日遲風暖物華新千花百草遊人路應道壺中別有春

白鷺文鴛鑑裏飛紅橋朱閣影參差疎林密雪應堪賞不特尋芳避暑時

深堂高閣起清風舟泛荷香柳影中日月待公逃醉飲官無拘檢是琳宮

夕陽照水晚登樓皎月涵波夜泛舟珍重前賢開展意中年長願守閑州

詩餘

千峰古樹

調沁園春

國朝

宋維藩

山色周環芙蓉高挿是處蓬萊記紫薇太守曾分符
至龍圖老子實秉鈞來馬目如嵩烏龍似岱如此溪
山洵美哉况裝點有飛簷雕檻別墅天開 蕭疎迥
隔塵埃更複道層軒遍綠苔看架間籤軸閒憑校閱
窓前亭沼著意安排林露烏巢礪懸漁網江上青峰
夕照回薰風遍喜俗淳民樸羲葛無悔

八面層巒

前調

前人

天目西臨複巘層崖滿眼青山恍苧蘿村畔崇岡翠
嶽滌陽亭側疊嶂廻環家在畫圖門迎蒼翠瀟灑飛
樓飄渺間相掩映是一灣澄碧萬壑潺湲 平生最

愛幽閑天賜與煙霞與未刪恰香巖霧瑣鳥飛知倦
雀溪漁唱我醉思眠細雨朦朧斜陽杳靄嵐影山暉
分外妍又何必再疏渠剔石點綴林巒

雙塔凌雲

調水調歌頭

前人

不見西湖上雙塔盡摧殘空餘一鏡明淨蕩漾碧波
瀾怎似嚴陵灘上鴈刹盤空矗秀突兀碧雲間百尺
樓頭上煙霧鎖闌干 躋塔頂瞻繡嶺面青山鐘魚
響苔聲聲鈴鐸語林端俯視雕甍朱棋依舊沙清水
白雉堞繞晴川極目鳥飛外遙數九州煙

二江成字

前調

前人

聞說瀟湘望波撼岳陽城長江浩淼無際何日問郵
程此地扁舟一葉到處蒼煙遠樹見底石嶼嶠白鷺
灘頭立荇藻滿前汀 溯激水合漸港宇成丁澄江
如畫一竿照影老巖陵最愛春山雨後滿鏡煙鬟欲
滴二水共盈盈坐待晚潮漲直接海門青

咏子陵魚

調簇水

徐

庾

太倉人

半寸銀花桐江上春風起高臺坐釣不信是為伊
投餌還似羊裘殘毳卷共楊花墜迎浪化千頭鉞細
真好事千載下鱗鱗白小誰為註先生字水衙彈
缺喜乍見香羹至想像梅家仙耜舉案耽風味更不

川戲賭金盤鯉

咏子陵魚

前調

王

賓

帶沫成羣春波蕩漾如雲起纖纖寸許笑逸叟高名
還繫渾似仙芽初焙珍重封題意但往遡投綸遺趾
愛此際餘韻在冰厨冷淡怕食肉人嘲鄙羨調碧
椀也小試烹鮮伎好與江鄉幽客細品桐江味休更
憶鱸膾秋風裏

七里瀨

補錄

王

嵩

太倉

峽束江流轉峰高日上遲鳥過青嶂合檣動翠屏移
身世巖陵釣山川謝客詩寥寥人境外千載有心期

過畱耕莊為陳明經允公賦

王賓 邑令

割取溪山勝青蒼小洞天奇葩當令發幽鳥息機眠

甲第多荒草名園半廢阡此莊如太古風景自年年

其二

公餘消野步見說有陳村不識人驚座還因竹邨門

雲生楚簟冷風過漢書縉蘇雲卿事回首鄉園隔蓬蒿沒

舊痕

書目

宋

學庸論語解

喻樾

玉泉語錄

喻樾

周易說

趙彥肅

廣學雜辨

趙彥肅

士冠士婚饋食圖

趙彥肅

明

詩經折衷

徐鳴揚

論俗俚言

徐鳴揚

齊民簡編

徐鳴揚

修身要語

徐鳴揚

六詔紀聞

俞夔

揚芬錄

俞夔

陽和稿

魯承恩

需命稿

魯承恩

睦族集

魯承恩

仰高錄

鄧春

西臺奏議

俞稷

詩韻指南

戴震亨

侶陶寄言

戴震亨

崇善約編

戴震亨

風世紀略 戴震亨

通鑑三筆 柴挺然

山斗章 柴挺然

以南草 柴挺然

陰符經註 柴挺然

春秋正旨 張立中

儒本編 蔡良士

一原編 蔡良士

西臺奏疏 宋賢

左傳撮要 宋賢

地理定宗 宋賢

岐黃要旨 宋賢

通鑑冠編 陳應中

醫學善傳 戴邦聘

國朝

四書訓要 王納表

周易訓要 王納表

醫方解 王納表

地理解 王納表

周易妄說 陳孔雲

耐寒呈詩文 馬天選

延壽集四卷 應垣宿

聽松書屋詩集 朱鎬

性理要說 陳禮

四書會解 陳禮

四書插註 張鳳藻

四彈子書 張鳳藻

易經備參 謝璣

四書備參 謝璣

河洛辨義 張鳳藻

砂水要訣 張鳳藻

儀度六壬 張鳳藻

增釋琢玉斧 張鳳藻

穿透真傳 張鳳藻

白雲閣詩集 宋繼藩

雪溪詩草 宋鈺

春秋心裁 宋之灃

滄嶼文集 宋之灃

寶硯堂文集 宋溱

奇好樓詩稿 宋 漆

惺惺堂文集 宋 楠

峯山詩稿 宋 楠

曲江詩稿 王 國藩

櫟園詩稿 王 基昌

性理纂 應 德華

五經撮要 應 德受

四書講說 夏 繩祖

建德縣志卷之九終

建德縣志卷之十

軼事志

昔左氏既為春秋內傳而又稽其逸文纂其別說以爲國語蓋其世遠其事繁非一說能該故其文多內傳所不載或重出而小異蓋將網羅衆說不能無事于補輯之勤也邑乘雖志一邑之事而世遠年湮更不獨三數百年之間而已是以旁搜博覽其事往往軼見于他說掇拾補綴烏可少哉然建爲山城小縣兵燹之餘加之水患殘編蕩失援据失真寡陋之譏知不免爾作軼事志

紀遺

遺文逸事為前卷所不及載者或不可以類紀
或為續所見聞例當補錄志紀遺

孝友有姓名無列傳者三人 見郡志

林儲棟 方彪

宋鳳來 明隆慶以前人

有主未列傳者二人 見郡志

張魯

楊鵬 萬歷以後人今楊鵬有傳張并無主

舊志藝文載宋知縣余植孝行記為宋孝子五人

立石其小註并載唐孝子五人今考郡志載唐

書睦州孝子五人姓名何起門建德人祝希進

戴元益桐廬人各有傳許利川方良琨二人無

考小註混入建德殊訛且孝行記郡志載入古

蹟文已不傳建德向無專志無從訂正其為植

作真偽未可定也故附說於此以明刪偽非刪

孝行記也

壽考

徐珂

壽一百一歲明嘉靖間奉旨建立百歲坊

趙世欽

字東泉世襲嚴州所百戶壽一百二歲明嘉靖間漕院旌曰聖朝人瑞

王廷瑞

字荳階少有高致性耽泉石幼時夢神人授大棗二枚及寤果得於几上食之覺身

體爽然因結廬北郊採蘭鳩學內養術一日大雪思食黃柑忽有鵲啣雙柑至啖之味同大棗

歸家端坐而逝時 壽百有一歲

鄧湍 府縣旌獎 一百三歲

王馬氏 王來聘妻萬歷四十二年壽 登百歲道院旌獎名載憲綱

何王氏 何一鸞妻康熙壬子壽登百歲郡守梁浩 然表其門協鎮鮑虎給扁曰恩光百歲

錢林氏 船民錢國亮妻雍正九年 壽登一百一歲建坊旌表

右百歲

鄧咸和 郡庠生年九十時以子美政成進士三受 封典栖跡林壑遇飲達旦不倦以課讀課

耕為樂後數 年乃令終

蔡良士 壽九十七 見人物

宋 澄 壽九十六 見人物

王政遠 壽九十四 見人物

余確 九年 冠帶壽

王應茂 字繼軒世傳醫術至茂凡十世業益精年 七十餘郡守延之診視躬親迎勞肩輿直

抵署門性敦樸鄉 里以古道稱焉

柴為櫬 字天目挺然子性聰穎退讓年四十餘得 失血症遂援例克貢絕意科名靜坐攝生

究心岐黃晚歲與脩縣志 時亦作詩自娛壽九十四

應垣宿 字爾奎遊庠後時值鼎革且得羸疾遂絕 意科名與柴為櫬同學靜養凡文星六壬

地理等書俱有手錄壽九十一歲考終之日語 子媳曰吾命當天且茲今衆孫成列年登上壽

可知命理難憑人當自立也著有野 星氏延壽集四卷以孫德廣膺封典

夏應昌 字銘卿康熙戊辰壽九十歲 無疾而終子之琦壽八十二

夏正昌 字長卿應昌弟康熙丙子壽 九十三子延龜壽亦八十二

施聖政 字上掄性不忤物有何姓負銀百金將出 抵還聖政憫其貧乏却之立所其

十子世榮 歲貢生

唐一樞 壽九十府憲給 匾曰高年醇行

何哲元 乾隆七年 壽九十二

余文盛 字衡甫 壽九十一歲

夏九嶷 字天與 應昌孫之琦子 現年九十歲 生平退讓不入公門 今猶矍鑠 可謂一門人瑞

孫衍慶 字玉英 邑庠生 現年八十六歲 父母病兩宗祠捐田為始 祖建德侯 壽登九十八歲 首創

祀產 今慶猶康健如昔云

王漢英 現年八十六歲 恩賜綿絹 卽 照 邑庠生 現年八十五

鄉飲

王納表 正賓 有傳

張允美 正賓 有傳

張 烜 正賓 有傳

詹惟祥 正賓 有傳

王家泰 正賓 有傳

王開泰 正賓 有傳

謝 璣 正賓 有傳

王希魯 正賓

謝 璣 康熙六十一年 正賓

王希魯 正賓

蔣徵文 雍正五年 正賓

趙守邦 字翰之 郡庠生 性孝友 博文敦行 康熙十年 鄉飲介賓 卒年八十有三

王 嵩 字次山 邑庠生 康熙三十四年 介賓 卒年八十

陳元凱 字君行 邑庠生 父時政 任福建惠安縣丞 卒于官 凱時方在襁抱 依母教養 成名為人 醇厚 孝友 公舉 優行 督學 劉公 獎 賞 康熙四十年 介賓 卒年八十有三

蔣肇昌 郡增生 康熙六十年 介賓

吳 琮 字廷玉 邑庠生 素性醇謹 孝事父母 克盡子職 敦族勵行 雍正五年 介賓

王啓明 康熙三十年 介賓

洪一襟 字期斯 為人端方正直 康熙五十五年 介賓

夏志臯

字司運性醇篤居家孝友捐己業為合族建祠宇嘗備棺以施貧窮輸粟以助賑粥

勤儉躬躬訓子成名舉雍正元年

性孝友端方自立尤樂善好施雍正五年

宋夢錫

字晉武康熙三十八年侯賓

宋士濂

耆老

鄭君贊

宋效湖

宋兆偉

宋劾昂

馬尙驥

宋劾慶

唐日章

馬之騏

唐昌齡

農官

王鼎臣

關日良

宋琦

蔣徵文

雍正五年

許德生

雍正五年

趙守邦

字翰之郡庠生性孝友博文敦行康熙十年

王嵩

字次山邑庠生康熙十六年

陳元凱

字君行邑庠生父時政任福建惠安縣丞卒于官凱時方在襁抱依母教養成各為人醇厚孝友公舉優行督學劉公獎賞康熙四十年

蔣肇昌

郡增生康熙六十年

吳琮

字廷玉邑庠生素性醇謹孝事父母克盡子職敦族勵行雍正五年

王啓明

康熙三十年

洪一襟

字期斯康熙五十六年

夏志臯

字司運性醇篤居家孝友捐己業為合族建祠宇嘗備棺以施貧窮輸粟以助賑粥

勤儉飭躬訓子成名舉雍正元年候賓卒年八十有六

吳汝璣 性孝友端方自立尤樂善好施雍正五年恩榮八十壽官

耆老

王鼎臣

八品農官

關日良

八品農官

宋琦

字京韓八品農官

蔣世康

八品農官

唐昌齡

馬之騏

縣給匾曰純心古道

柴繩祖

舉鄉耆年八十

鄭君贊

宋效湖

年八十五現見五代

宋兆偉

馬尙騏

宋效昂

唐景鰲

唐日章

陳周文

劉文錡

吳錫臣

蔣星居

李然

宋士略

馬如殷

董元淇

舉

校士館

明崇正十五年邑紳宋賢捐銀一千有奇始造試館督學王應華有記其基稅尚存

宋戶未入公占後

國朝康熙間邑紳詹嗣祿助石墊基今再改造即其舊址

銅官潭

建邑銅官潭每年漁戶納魚課銀一十六兩向係新進士輪收康熙癸丑進士王齡

昌馬天選暨生員趙昌祚因縣學人多胙少具呈入學增春秋二祭頒胙諸生之費

街道石

康熙二十一年大水街道淤塞兼遭饑饉邑紳蔣鳴梧捐米千石煮粥賑饑外復探

石鋪砌通城大街一時平坦如砥行道至今頌之

魚鱗册

先是縣庫鱗册被燬雍正六年國學生馬

校對無訛心力既殫捐銀亦多以一人任

合邑事郡侯蔣林給額旌之曰澤及閭閻

同善會

先是樂善施棺各自發願未有恒產吏員夏鼎奕市民許聖芳胡旭光等各捐己資

置買澄清門內店屋二處每年收租息銀八兩再合樂輸之銀買棺施捨其東首地字號官基

二厘五毫又西首宙宇號官基三分七厘二毫在前明本營地後官基民佃稅輸府庫克公因

府稅豁免照號

小里渡

乾隆九年里人錢士瑩捐田三畝三分一厘一毫五絲塘二分四厘七毫五絲收租

助給渡夫口食

乾隆十六年紳衿耆庶公捐買米煮賑姓氏

張起運

捐銀三百六十兩現在題請議叙

王均

司道旌獎

蔣自超

夏長慶

黃國誌

鄧嘉言

吳芝淦

施世榮

鄧榮學

鄧榮勤

王以彭

王懋學

宋湮

劉文英

張時杰

童與權

夏惟睿

陳希愈

余憲光

餘不備載

按是年亢旱鄉城乏米知縣蔡公其昌勸喻邑

中殷戶各出貲本多者千餘兩少者十數兩合

之得一萬數千餘金憲司給照赴江蘇買米平

糶事竣仍散還貲本各無虧折稱一時善政而

其間以十分之一煮粥散賑不取貲本則知府

吳公士進與知縣蔡公倡率士民推惠貧窮也

經理公平則貢生詹肇衍生員喻懋烈之力為

多今惟錄其捐貲煮賑者如右

論曰昔人有云富人者州縣之本上下之斷賴也夫浮客佃戶假田於富人貧難乏絕借貸於富人游手末技傭作奴婢仰食於富人故富人者衆之母也然假田於富人爲富人代耕墾也借貸於富人爲富人權子母也仰食於富人爲富人供使令也計其勤勞亦足相當且由是而案牘繁多竭州縣之力大半爲富人役耳而一旦有水旱之災民無旦夕之儲官有非時之急則勸分出粟爲一時拯危卹患之謀亦爲富人思害預防之策不取具於富人而誰屬哉然人情惟知自利平昔厚自封殖臨事輒思苟免又往往而然於是有好義樂施之士不憚重貲悉公家之急於鄉里敦輯睦之情於國家舉惠養之政豈不甚有可稱者乎此

朝廷叙勞之典所以不廢也爰志其人以勸來者

普濟橋 在城南二里

登雲橋 在城南二里

上新橋 在城南二十里以上三橋因乾隆十七年出蛟大水衝塌武舉魯吳銓獨出已貲四百餘金重建

便溪橋 在縣南十五里

同佳橋在縣南二十里以上二橋邑人王秉致捐已資百金重建

南關東馬頭乾隆十九年生員夏見龍脩築長七十餘丈

脩築余浦橋鄉耆方開祚顧天福仇正先何三緒趙嗣昌王廷元喻文標邵希元胡超

倫汪旭彩黃世甲關時逢關時偶

乾隆十九年脩築城垣捐輸姓氏

張起運 施世榮 王 勳 夏長慶
夏餘慶 張德泰 程五福 姚廣燾

補遺

陳士昂字鳴球為人重然諾慷慨好義寄籍順天

府宛平縣由例貢生捐縣丞應陞初授貴州都

勻令尋陞趙州知州兩遇 覃恩致仕家居卒

許搏翻字雲萬郡廩生美丰儀多文藻由例貢生

授嘉興府學訓見知于督院李公衛以才能薦

陞授湖廣攸縣知縣緣事歸卒

右鄉達

明詹克誠洪武初以明經舉為臨海教諭志永永

樂初亦以明經舉為雩都教諭孫仕本天順間

由太學生授潛江教諭三世教鐸訓迪有方人以儒紳家稱之

陳于廷字君俞潛心苦學鄉試兩中副車膺崇正壬午歲貢授江山訓導在任三載兩署邑篆教誨士民以忠孝爲先明末解組歸閉戶讀書終年不出年七十卒

戴啓正字養和篤學工文膺崇正癸未貢任温州永嘉訓導留意作人嘗詣江心寺大集闔庠生徒課文燕飲談笑咏歌雖質性端方不少風流蘊藉之致年八十三卒

割

陳元選字君最郡廩生讀書砥行篤於孝友兄弟五人和翁無間嘗以仲兄貧乏割己產贍之鄉黨舉其行義憲司多爲褒獎有云羅羣典而劾居稽識窺學海有多才而裁宥軼功砥文瀾旣困不墜志而貧益勵操敦孝則逾耄之親怡顏可挹讓產則數齡之姪弱質賴存能居方以從繩惟釋利而循道其見重如此

右儒林

宋銓字子遴邑庠生中丞賢孫也克康熙己卯貢

性謹飭鍵戶讀書不與戶外年七十三卒品行
端方文才敏贍鄉黨稱之弟鎬字子京亦庠生
爲人誠樸長于賦咏由例貢生任湖州府武康
學訓著有聽松書屋詩稿

戴曾字聞衣號魯齋鄞撫東旻曾孫也幼穎悟弱
冠游庠長於詩古文辭家貧舌耕養親從游其
衆操行端潔前後學使及邑令多重之常稱以
先生而不名卒年七十九疾革時對子孫惟以
誠一無欺爲訓

張鳳藻字九儀邑廩生博學多能屢試不第以
監入北闈復不第精青烏術公卿爭迎致名於
江浙後以毘陵高侶嵩聘刻鉛彈子書乃攜次
子遷居無錫年八十授全州吏目又五年致仕
歸錫山越數日卒年八十五所著有四書挿註
麟經穿楊技河洛辨義四彈子註砂水要訣
釋琢玉斧儀度六壬穿透真傳等書行於世

宋之澧字飛雲舉人注籍中書器宇凝重孝友
躬學術淹博兄法早世撫其孤備至及長旣
而後析筋焉連赴禮闈俛得復失者再遂閉
著書間以詩賦自娛有春秋心裁滄嶼文集行

於世

俞志虞字作舟邑庠生克康熙壬寅歲貢善屬文
工楷法兩庠碑版聯額多出其手與脩縣志卒
年八十餘

馬岳生字誕申幼失怙乘母教弱冠游庠食餼
克例貢終母喪遵營田例入貲以知州卽用
班分兵部車駕司學習雍正癸丑卒于京有選
訂考卷誠中集行世

宋洽字伊人幼警敏未弱冠餘於庠嘗之吳與汪
武曹份吳荆山士玉評遠制藝由康熙壬辰貢
選授昌化訓導至卽葺明倫堂整理祭器以興
學校爲任昌邑宿弊凡祖父未列膠庠者雖士
著居人無得與試必邀以重貲始得就考洽詳
請禁革寒峻得以上達因勒石誌焉又諸生七
人以非罪被按洽力辨雪之在任一十八年以
老辭職士民留之不得相率送歸年八十六卒
以子楠貴贈翰林院庶常

右文苑

楊萬邦字寧甫邑庠生能文善奕品登第二鼎革
時憤然祝髮爲僧入山不反士林咸頌其高

右隱逸

王鼎梅以字行性至孝幼業儒父嘔血三年躬親湯藥衣不解帶始終無倦色歿後哀毀廬墓二載遂棄學力田教育子弟生平居處端方行敦古道公舉約長為一鄉之望云

吳選字中宏為人剛方重義輕財因族姓繁衍捐田數十畝入祠供祭祀又篤友愛胞弟文邁身故悲慟成疾相繼而亡

王國藩字與賓邑廩生天性聰慧言笑不苟幼失怙事母極孝康熙庚午母病親侍湯藥屢月不

倦後病愈劇乃進香齊雲禱于祖師願以身代夜夢神示曰吾成爾孝志及歸母病旋瘳而國藩遂染病不起聞者異之孫錫田性孝母蔣病危嘗對股療之學使于公敏中給匾曰行似左丞

吳蔭字天錫國學生幼失怙事母孝與弟蘭友友愛至老不倦為人廉謹寬和敦宗厚族乾隆十一年公舉介賓因病未赴年八十一卒

右孝友

王應聘事親至孝少失偶誓不娶時人義之

舊志原補

王秉致字贊盛幼業儒因貧服賈成家後復畱心
書史自叙年譜備述早歲艱辛名曰悶無伸錄
生平輯宗譜建祠堂脩祖塋施棺槨捐造橋梁
前縣薛公委任工程監督煮賑無不殫心屢蒙
獎賞兩舉俱賓年七十一卒次子勳暨長孫均
各以捐賑蒙院司旌獎皆其貽謨云

張來廷字觀斯國學生考授縣丞先世仕宦清貧
來廷獨力起家昆季後急倚之又嘗于歉歲出
米助賑或暗增其量不令人知創置宗祠凡建
津梁甃道路畧茶寒絮等事力行不倦子起運

以賑荒議叙及助脩文廟皆成其志也現與監
脩城垣及志乘

童可進字尙如敦睦好義捐田十畝爲本宗祭產
子元藻承父志復捐田二十畝以周本族貧乏
及子姓之能讀書者

馬治國字階平父貧兄專治舉業治國乃以廢箸
起家室無異財並得其權嘗爲吏多所激揚鄉
人敬憚至不敢爲非性喜俠婚喪不能舉者助
之歲饑常傾囊賑貸康熙六十一年當事設粥
賑饑里中男婦苦道遠治國白其狀爲特增一

厥及撤賑而二麥未熟治國復傾困繼之當事
嘉獎年八十餘卒

夏有正字符中郡庠生海康令日昌仲子也年十
八失怙昆季五人有正繼叔父後與諸昆季均
析嗣產無所競事嫡母生母克盡孝養邑有公
事及水潦災曲折經營不恤勞瘁邑令長皆倚
辦焉

右卓行

國朝

夏基字樂只江南休寧人性豪灑以淹貫馳名尤

工於詩詞初僑居西湖後隱於建之方山喜深
墨作山水兼善蘭竹寫意在郭河陽鄭思肖之
間有泊菴詞話磊人詩稿西湖攬勝詩選行於
世

右流寓

沈士斗字國杓性質直篤於天性丁兵燹備歷艱
苦竭力奉親喪葬如禮及析產以美田宅讓弟
而自取荒陋親族有不給者隨力周恤遇事多
所排解年八十卒長子如日四子天成別有傳
以孫逢舜貴贈如其官卓行

陳一鳳字瑞鳴幼喪父母家貧服賈不廢卷牘通古今敦氣誼知府梁公聞而重之族黨孤貧者賴以婚配成家義聲甚著晚舉賓筵不及與而卒以子宗泗貴贈如其官 卓行

宋景祁字爾京邑庠生博學多才游京師以宮詹高士奇薦教習旗人期滿任平湖教諭課士先德行而後文藝未幾卒於任 文苑

沈天成字錫元邑增生父年邁師事長兄積學厲行不苟交遊邑侯戚公甚器之爲文精思孤詣試輒高等與同邑陳宗泗張雲鵬雲鸚齊名屢

躡場屋授徒課子恬然自得人稱其有潛德云

子二長逢堯邑庠生以次子逢舜貴贈如其官 文苑

宋衡字璿玉邑庠生耆賓夢錫之長子也積學能文昆弟四人衡承父命理家事或疑其有私及析箸而衡較貧於諸弟衆乃服鄰人有無妻者以所蓄餘金屬衡藏之逾年而其人病衡出金還之人始知其事衆皆悅服平生言笑不苟鄉里重之卒年六十有六 文苑

戴高字景上邑廩生博學能文狷介自守學使彭

方洲先生聘佐校士選有直省考卷行世遠邇

傾慕 交死

王爾霖字司膏性孝友因貧棄學力田成家志

娟睦凡里族中困乏者雅意周恤生平荒歲賑

饑病涉建橋更多義舉前尹田公雅重之與康

熙乙酉賓筵年七十二卒子三長庠生幼子之

屏字瀚英慷慨有父風凡建祠堂立祀產皆前

人未了事克繼先志教子成名屏子懋學現膺

戊午鄉薦 卓行

右續補

候旌節孝

節婦朱氏 包上品妻年二十四夫亡守節無子年七十三卒

節婦施氏 生員蔡九舉妻年二十二夫亡守節撫子恩榮先母卒年六十

節婦徐氏 王二生妻年二十七夫亡守節撫子繩武為諸生年六十一卒

節婦朱氏 夏雲蛟妻年二十二夫亡守節撫子尚松成立年七十三

節婦沈氏 生員王襄睿妻年二十七夫亡守節撫子成立年七十八卒

節婦王氏 生員張其屏妻年二十六夫亡長子天衡甫六歲次天德生甫七月矢志守節撫孤成立年八十六卒

節婦施氏 柴正侯妻年二十八夫亡守節撫子光祖卒年八十

節婦王氏 徐廉五妻年二十七夫亡守節撫子成立年八十五卒

節婦包氏 戴吉先妻年二十九夫亡守節

節婦王氏 阮雲彪妻年二十四夫亡守節

節婦馬氏 陳希堯妻年二十六夫亡守節撫子若

節婦童氏 曾為諸生若曾又亡無子年七十二卒

節婦何氏 生員陳軾妻年二十八夫亡

節婦夏氏 無子家貧守節年七十六

節婦何氏 生員應紫宿妻年二十夫亡守節坐

節婦夏氏 生員詹開禧妻國學生有入之文也母

節婦何氏 柴早歿事繼母以孝聞及歸開禧生子

節婦何氏 嗣祿嗣業而開禧病篤氏禱於天刲股和藥以

節婦何氏 進乃差又二年而歿氏矢志撫孤時丁耿逆之

節婦何氏 亂浙東大擾流離轉徙家遂中落亂定拮据補

節婦何氏 葺家復饒裕舅歿有少妾發居氏乃昇以千金

節婦何氏 復厚卹其昆季以安其志平生調給親串撫育

節婦何氏 孤幼以及拯災恤難出粟賑饑種種善行動費

節婦何氏 千百脫簪舉息弗恤也當其病革時里中大疫

節婦何氏 猶遣人赴省城市藥以施病者鄉黨稱為女中

賢豪嗣祿康熙癸未進士官至給諫諷

業以明經通仕籍人以為積善所致云

節婦璩氏 柴耀祖妻年二十五夫亡無

節婦詹氏 柴秩斯妻年二十二夫亡守

節婦馬氏 生員魯聖玉妻年二十夫亡

節婦黃氏 守節無子家貧年七十卒

節婦汪氏 生員吳念祖妻年二十七夫亡

節婦汪氏 宋效濂妻年二十六夫亡守節三子俱

節婦汪氏 給扁曰柏 幼撫之成立卒年九十二郡守梁浩然

節婦汪氏 舟節操

節婦蔣氏 郎承綬妻年二十一夫病割股療之卒

節婦王氏 不治家貧守節撫子成立年五十一

節婦王氏 生員程宗澤妻年二十九夫亡守節家

節婦王氏 貧子幼養姑以孝姑歿依母趙氏復孝

節婦王氏 養孀母撫子法為 諸生年五十八卒

節婦陳氏 徐元璧妻年二十二夫亡守節撫子學禮為諸生年七十九卒

節婦蔡氏 張兆龍妻年三十夫亡守節撫子永熙成立卒年六十七

節婦夏氏 生員王遇妻年十八夫亡守節孝事舅姑喪葬盡禮撫遺腹子致潤為諸生年

八十卒

節婦吳氏 馬德宏妻年二十九夫亡守節撫子世美為諸生年六十二卒

節婦邵氏 生員仇璟妻年二十九夫亡守節事姑孝養撫子耀為諸生年八十一卒

節婦項氏 生員吳元玠妻年二十二夫亡守節無子年八十九卒

節婦陳氏 何承舜妻年十九夫亡守節孝養舅姑子芝青甫周晬撫之成立年六十八

節婦夏氏 蔡士俊妻年二十七夫亡守節姑瞽子成只子夏新現度日現年五十八

節婦吳氏 生員蔡梧妻年三十夫亡守節撫子巖成立年五十卒

節婦方氏 何起元妻年二十三夫亡守節撫子秀栢成立卒年五十一

節婦吳氏 胡清妻年二十六夫亡守節撫子孔彰成立年五十卒

節婦歐陽氏 童元琮妻年二十八夫亡守節撫子天機成立年五十九卒

烈婦孫氏 武舉倪祚鼎妻年二十九夫卒於京氏聞訃哀慟絕食五日一慟而絕縣尹璩

延祐旌之

節婦張氏 程舜年妻年十七夫亡無子舅姑憐其少欲嫁之氏堅執不可及姑亡舅老屋

被鄰火延燒家益貧守節二十三年親鄰不聞其聲罕識其面及卒里黨稱歎至今不絕

節婦包氏 仇學謙妻年十八夫亡子生僅一月矢志守節撫之成立同知王元令副將葉

時芳並旌之現年五十一

節婦錢氏 仇三謙妻年二十二夫亡守節撫子成立現年五十八

烈婦唐氏

吳曾妻年二十一夫亡貧苦無子父母欲嫁之氏入室自經救之乃甦忍受饑寒三年服除即於是日泣拜君舅沐浴更衣絕粒而死親族往弔無不感涕

節婦謝氏

生員仇尊榮妻年二十二夫亡無子立嗣守節累縣朱嘉其給匾旌

節婦殷氏

生員吳文樸繼室年二十九撲亡守節撫三子芝芾芾茂俱為諸生年五十六卒

節婦吳氏

吏員童天慶妻夫亡守節繼姪現年五十歲

孝婦周氏

妾施氏周氏明經詹肇衍繼妻施氏行妾也周年及笄歸肇衍

孝婦陳氏

郡庠生朱轂妻父熙績無子氏克兼子愈丙辰秋轂赴省闈始吳耄年猝病瀕危氏復封右股雜糜以進姑心疑之不忍食翌日乃卒邑人聞之當事咸加旌獎年五十七故

孝婦田氏

吳士焯妻康熙三十八年十一月姑湯氏病篤田割股和藥以進姑復蘇延二

節婦程氏

汪元簡妻年十九夫亡守節撫孤成立年六十卒江西瑞州守邑人趙世錫有

節婦吳氏

生員夏澍妻

節婦柴氏

徐上燈妻

節婦童氏

蔡萬奕妻年二十五夫亡守節撫二子成立年七十三卒

節婦周氏

柴梅 亡守 八年二十

節婦鄧氏 謝耀先妻年二十七夫歿 氏林扶柩 歸葬撫子騰蛟為諸生年七十三卒

節婦謝氏 貢生陳紹祖妻年二十九夫亡守節 無子年八十五卒督學多始擢旌獎

節婦王氏 陳文裔妻年二十九夫亡守節孝養君 舅年登九十撫子中本為諸生年五十 卒

卒

節婦王氏 謝乘文妻年二十夫亡守節 遺腹止一女現年六十五

節婦邵氏 錢汲妻年二十八夫亡守節 僅一女適吳謙懿年六十卒

節婦施氏 生員宋純妻年二十八夫 亡無子守節年六十卒

烈女沈氏 王開運聘妻庠生之後之女也既許字 里人有欲強委禽者既而開運弟歿訛

傳開運病故女即嗚咽悲哀是夜歸房達旦不 聞其聲及挾戶視之已自經死衣俱素白密縫 不可 解云

烈女王氏 吳文蔚聘妻年十八薨亡女欲奔喪 母不許兩次服毒解救得甦三年服除

竟以病卒臨歿猶張目囑 厝夫穴邑人吳人楫傳

節婦王氏 廩貢候選知州馬岳生繼妻年二十 夫亡守節撫幼子壽域壽華域為諸

現年五 十二

節婦洪氏 生員柴孔授妻年二十九夫亡守節 事翁姑撫子大經為諸生現年五十一

節婦徐氏 夏鼎新妻年二十八夫亡守節孝事 舅年登九十撫子沈法俱成立現年

節婦楊氏 生員許綬章妻建德人年二十九夫亡守節撫 子許鎬亦亡九加勳後間里賢之現年五十六

節婦湯氏 王家正妻年二十八夫亡守節子魯壽 繼歿孝事翁姑俱耄耋現年六十二

節婦邵氏 方魁彥妻年二十九夫亡守 節撫子太幸成立現年五十

節婦陳氏 張日緒妻年二十一夫亡守節孝 事舅姑立姪承祀卒年六十二歲

節婦程氏 生員施必相妻年十九夫亡守節敬事舅姑撫遺腹子玉書為諸生年七十九卒

節婦陳氏 吳兆旦妻年十八適兆旦一載夫病謂氏曰吾病必死家貧汝無以自存汝所之氏泣曰婦人之道從一而終况姑年

幸而有姪天不絕君後得生男願事姑以老肯復執巾他人乎夫死月餘果生一子其心苦為人浣濯養姑撫子之死靡他現年五十

節婦陳氏 李耀妻年二十六夫亡守志撫子瑛成立卒年五十九

節婦朱氏 謝秉鑑妻年二十五夫亡子夭矢志守節舅姑憫其年少屢勸改適氏之死靡

他立姪謝鳴鵬為子現年六十四歲

節婦楊氏 王國泰妻年二十三夫亡矢志撫孤現年六十有一

節婦陳氏 貢生詹嗣業妾年十七歸嗣業持身恭順得內外歡及嗣業病奉湯藥甚謹卒

後欲以身殉正妻張苦勸止之時年二十四張病待湯藥如事嗣業笑孤婦備歷艱苦年六十九

節婦駱氏 鄧林巖妻年二十二夫亡子榮都生未逾月矢志守節撫之成立年五十八卒

節婦陳氏 何如雲妻年二十九夫亡守志年九十四卒知縣薛景珏給匾曰柏舟自勵知

府張芳給匾曰柏舟勁節

節婦胡氏 舒文達妻年二十七夫亡矢志守節撫孤成立現年七十九歲知縣薛景珏給

匾曰勁節

節婦柴氏 卽承宗繼妻年二十八夫亡守節家貧紡績自給撫子鴻長成現年五十一

貞女徐氏 許元紳聘妻舉人兆霽女也元紳卒女年十九誓不他適乾隆元年歸於許孝

事孀姑撫姪一夔為子現年四十三

節婦陸氏 生員方鶴年妻年二十八夫亡舅以哭
子喪明氏矢志守節孝養舅姑年皆九

旬撫七齡子木為
諸生年六十一卒

節婦朱氏 方承恩妻年二十九夫亡守節撫二
子廷璣廷琇俱成立現年八十八歲

節婦唐氏 傳肇昇妻年二十九夫亡守節
撫子師成立卒年八十二歲

節婦何氏 吏員馬鈞妻年二十六夫亡守節
撫繼子步雲為諸生現年五十四

節婦吳氏 馬錡妻年二十九夫亡守節撫
子登雲為諸生現年五十二歲

節婦朱氏 監生潘一相妻年二十三夫亡守節
撫子國賓為諸生現年五十二歲

方技

方技之興其來尚矣然而迂誕者誣民詭託者
欺世兼收並採恐屬不經而乃載籍務博體宜
詳備今錄其技能可紀者著於篇志方技

明方叔和字節之精通醫術兼讀儒書成化間禮部
列名欽取赴京授御醫適岐王遘疾叔和診療
有効累受白金文綺之賜八年陳乞歸田賜之
勅命有曰御醫方叔和早有醫名旋登仕籍歲
年滋久勞効良多用進爾階錫之勅命益精乃
術毋曠攸司後卒于家子百壽國子生蚤卒姪

孫應元承繼嘉靖乙卯鄉薦

張魯字龍門邑庠生居建安山有耽水尋龍之僻家藏廖顛遺書魯習之精其術遂以堪輿遊公卿間學使陸完學嘗延至家卜筮驗其刻應不爽銖黍甚加嘆異後完學累官浙撫魯遂爲入幕之賓年九十三卒

仇鳳翔字敬寰通悟方脉諸書尤善療小兒疾不用藥餌但視其經絡所至以手摩按令汗出立愈諸童子賴其調護云

林文耀字絅齋幼穎異精書字法道勁在趙松雲

伯仲間中年日失明臨池之興終不能忘乃以紙爲字勢飛動若龍蛇點畫不差粒黍人驟目之以爲繕書初不辨其剪也室人善裝裱成軸易薪米自給至今傳曰林剪

國朝

戴邦聘字起莘以醫術名爲人療治輒効尤敦行誼嘗建橋亭以利行者周貧恤乏施藥餌不責其值當事重之舉與賓筵子天祐篤于孝友父歿時年十七奉養寡母先志承順撫幼弟天禧成立工父業起活甚多制府延之軫視甚優禮

焉所著有醫學善傳若干卷

何安華字衡雨攻岐黃術兼精內外求療者若市

無貴賤咸應之性尤樂善散粟掩骸嘗拾遺金

于道俟覓者驗而還之歲饑愚民掠食為富家

所訟繫獄者多染疫症安華晨夕診視不少倦

且請之所司曰此冤抑所致也祈釋之當道重

焉年八十卒子長庚傳其術又顯云

仙釋

釋老之興延於叔世儒者所弗道然前史謂其

神迹詭怪理絕人區感驗明顯事出天外則其

實亦未甚誣也志仙釋

漢方仙翁即漢尚書令懸侯儲也初拜議郎轉洛陽

令加太常卿儲言天變郊祀宜更擇日帝不從

死于非命後果言驗追悔無及後人見其乘鶴

往來新安始信其仙因為之歌曰朝為洛陽令

暮作新安人餘見本傳

晉許遜字敬之江西南昌人聞豫章吳猛學道能通

靈達聖遂往師之及至猛卒遺言其子吾去後

當有東南人許遜來學宜以真符相授子如言

授遜遜奉持感驗有愈於猛相傳遜未仙時曾

於烏龍山脩真煉藥嘗蓄一白鹿每下山詣人家乞火今山麓有大坪差低於四山居其中若環堵然者人以丹基名之每羣鹿相聚前有水池久旱不涸雩禱則禮之

唐許宣平新安人常掛一花瓢携一曲竹枝每醉卽獨吟曰負薪朝出賣沽酒日西歸借問家何處穿雲入翠微好事者題于洛陽壁間李白見曰此神仙也後亦仙去

唐詩紀事

少康俗姓周縉雲仙都人母羅氏夢至鼎湖峰見玉女手持青蓮花授之曰此花吉祥寄汝已而

有娠迨生青光滿室香如芙蕖七歲未言母抱入靈山寺瞻佛像康忽語曰釋迦佛聞者異之十五歲出家從學諸方貞元中至長安求見留善導和尚真像像化爲佛身謂康曰汝依吾行法化導衆生同歸安養名爲善導康如所證南至江陵果願寺遇一僧謂曰汝緣在睦州言訖不見康因至睦州日乞食城中得錢誘小兒誦阿彌陀佛一聲遺一錢卽高峰山巔建淨土道場集衆齊聲念阿彌陀佛康獨聲高見佛從口出連誦其出若聯珠坐逝之夕有光燭烏龍山

建德縣志 卷之十一 古
山變爲白色宋元符三年賜號廣道大師
道明睦州人俗姓陳初生時紅光滿室父母異之
長入開元寺爲僧契法于黃蘗斷際禪師常自
織草屨鬻以養親及施行路者人因號爲陳蒲
鞋黃蘗兵壓境郡人洵懼請于明明告以勿憂
爲大草屨令標之三十里外木杪巢見之卽舍
去自是郡人益尊禮之號陳尊宿或有邛激隨
問隨答宋元符中賜號悟空禪師因建尊宿菴
以居之

宋唐廉真本邑女子旣嫁得血疾夢道士與藥服之

而愈自是與夫相離從師脩道徑謁何仙姑至
宋淳熙中在郭家食飯次若有人喚者出門逢
三仙人問曰汝欲超凡入聖耶畱形住世耶棄
骨成仙耶對曰有母在願終養因與丹一粒吞
之遂不復食後召入德壽宮封寂靜觀佛真人

國朝

僧朗明本維揚人生數歲父母捨之出家後住普
陀落伽山矢發宏願欲造觀世音像長四丈八
尺合四十八願及善財龍女彌勒諸巨相乃往
休寧縣行乞募之數年始就航至建德澄清門

舟膠不可動明日菩薩乃欲居停于此耶以筭
卜之誠然遂于南岬觀音山闢地數畝建大福
禪寺亦名大佛寺內供諸像奉戒甚嚴未嘗輕
入城市一日忽召其徒索筆題偈端坐而逝
禩祥

陰陽之事非吉凶所生子政之說世多疑之然
而豐凶水旱關乎民事不可不謹志禩祥

祥

吳永安五年黃龍見于新都之靈巖山更其名曰飛
龍山

甘露元年建德水涸獲大鼎進吳王改元寶鼎封
太守孫韶爲建德侯

劉宋元嘉二十年白熊見于新安守臣以獻

宋景定中瑞麥生于東郊公田中知州錢可則繪圖
以獻宣付史館

明萬歷三十九年春麥大有

崇正十六年春二月烏龍山霧成綠色

國朝

順治六年竹閣產靈芝于大木杪

康熙十一年春麥秀兩岐

康熙二十二年秋大有年

雍正元年大有年

乾隆三年秋大有年

乾隆十七年春麥大收

襪

晉神龍元年三月乙酉大風拔木暴寒且水

證聖元年六月隕霜殺草

宋嘉熙四年夏秋大旱明年春民食橡蕨路殍相枕

藉

淳祐十二年夏大水五日乃縮壞公私廬舍甚衆

紹興三十一年冬雷無冰恒烟如夏

明正德四年十一月隕霜殺草竹木皆枯花卉無遺

種

嘉靖十八年大水踰城及府儀門漂沒田廬不可

勝計

嘉靖三十年二月初八日大風吹瓦如葉元學園

鐘飛墮城外

萬曆七年青蟲啖食田禾幾盡

萬曆二十二年五月初六日未時地震

萬曆二十七年大水旱田禾不登山竹生米民採

而食之全活甚衆

萬曆三十二年十一月初九日戌時地動塔屋有
壞者

萬曆三十五年夏大水壞田萬餘畝深沒房屋溺
死男女不可勝數

崇正元年七月火澄清門內外民居焚燬殆盡延
及城樓

崇正十五年夏大水驛東民居六十餘間塌于江
國朝

順治四年斗米五錢八年斗米四錢

康熙七年六月十七日戌時地震生白毛

康熙二十一年五月大水踰城六月再發

康熙三十八年夏六月大水踰城

乾隆九年秋七月大水驟至居民無備自徽州一
帶漂沒田廬生畜棺柩木植不可勝紀

乾隆十六年歲大祲撫恤加賑備至民賴更生
雜錄

時俗所傳每多訛繆疑以傳疑亦郭公夏五之
義也語非一端事無專主總名曰雜志雜錄

三元坊在府正街宣威橋上舊卽橋爲名後因商文

毅三登首選從而昭表之西首有前任胡郡牧諱
崇德者立碑于左 續郡志

羣賢峰卽二峰尖萬歷四年同知林休于峰上建真
武廟方杖基時得一石上書曰羣賢峰三字臨建
之日四鶴呈祥會稽羅萬化記其事以爲休徵按
今廟宇傾圮休徵未驗其羣賢峰三字在昔易名
固雅馴也

臺子巖在縣東北三十五里烏龍山之左相傳唐少
康禪師念佛放光處亦名放光臺此條舊志增出
考無確據再按少康本傳念佛在城市坐化放光

則在高峰山卽光燭龍山亦在山面臺子巖在山
背其爲訛傳無疑

錫泉在靈石寺後泉從石出常流不竭舊志因郡
志水利一目載泉重複未收入按建邑山泉似此
類者指不勝屈卓錫之名考無實據何必假靈于
釋氏乎

福泉在縣西五十里泉水寒冽人多汲之石井泉在
縣西八十里泉湧石井中上有石屋下臨田畦流
注不竭二泉見郡志今未能考實故附此

胥村因伍子胥逃難抵此遂以名村村之北有山名

胥嶺下有子胥廟水環廟前名胥水東入于江名
胥口按史記伍員亡楚奔吳到昭關昭關欲執之
員遂獨身步走幾不得脫未至吳而疾止中道乞
食至吳進專諸於公子光退而耕於野光乃用專
諸刺王僚而自立是爲闔廬以員爲行人謀國事
遂伐楚入郢其後闔廬死吳夫差立宰嚭讒員於
夫差賜屬鏤之劍而死取其尸盛以鴟夷浮之江
中吳人憐之爲立祠于江上因名曰胥山又按唐
李太白作溧陽瀨水貞義女碑則子胥乞食處當
在溧陽今云逃難至此疑無所據

新定志

朱池在縣西三十五里相傳爲朱買臣讀書處其東
有朱太守祠唐李頻文其碑石今不存而文傳然
詞頗淺近又頻集不載爲可疑又謂吳王濞舉兵
民不遑居公逃難至此挹下涯水飲之曰水香而
善其地可居於是深入大周得地爲蓬華而居之
後去官因家於下涯之上築室讀書鑿池爲滌硯
所後人卽其姓而名之曰朱池因地招來名其里
與橋皆曰招賢此皆本傳所無者其他皆倣本傳
傳謂買臣語其妻我五十當貴今已四十餘矣而
碑作四十當貴今三十九矣當是故爲立異又云

成帝末年立祠于烏隴之後今又立祠于朱池而不著歲月今二祠俱存 郡志

幽徑山有漢會稽太守朱買臣墓距朱池五里蓋買臣為會稽太守居歲餘受詔將兵擊東越有功入為主爵都尉列九卿數年坐法免官復為丞相長史告張湯陰事湯自殺上亦誅買臣而葬在此地者當是其子山拊護其喪來葬此山也蓋富春在漢初隸會稽後乃分隸吳郡而此則富春之地 郡志
康希仙相傳唐永徽三年為睦州刺史自州并仙因名其地為陵仙角嘗見顏魯公撰海濮饒房睦合

六州刺史康希銑神道碑載希銑自房州刺史睦州遷古州開元初入計請致仕三年歸其鄉會稽郡冬十月二十有二日不幸以疾卒春秋七十蓋希仙即希銑也昇仙云者好事妄誕傳之爾 郡志
傳燈錄載陳尊宿法嗣二人其一睦州刺史陳操其一嚴陵釣臺和尚註云無机緣語句不錄而錄操語有與僧論禪自摑云操罪過及齋僧操自行食按刁衍記載睦州刺史名姓甚備又元和姓纂皆無陳操以時考之當是陳晟或後改名操爾傳燈錄所載蓋不足信也 郡志

舊志載裴谷塢在城西五里俗傳爲裴丞相故里無考再考舊志又作陪郭塢此說近之

建邑山水清秀前代稱地師者多有遺記真贗莫辨惟吳景鸞十二記統論郡城風水爲郡人所信服

因附載于此

高樓遙望翠凝眸兩港趨流壓案頭誰識太陽當正位若來爲守定賢侯

四方駁雜太多山水少滌迴只見灘因此富家無久日本金二姓可長安

兩制兩府因何少只因吳上少尖峰他年釋教重

興塔便有高才顯帝宮

爲官纔興不歸鄉水去無情一直長更有一般堪笑處爺事多由兒主張

穿心水激明堂中背後黃泉又透通若得石幢居吳位方謀兩制并監宮

屯軍山鎮坤申下此處止宜草木興若見本方人掘破須憂土寇動邊庭

一年兩次水歸城見此須防火盜驚卯吳二方重建塔狀元從此冠羣英

水決西湖方出相州衙重建富兒多兩邊更鼓衙

庭歷欣遇賢侯且免戈

三年之內數年間損盡州民淹盡山從此太平三

百載萬民豐富一時間

北門水決出西門免見穿心八字分從此人民多

富貴更兼孝義譽公庭

周圍四嶺多叢雜市上人多輕薄兒凡物正當華

飾處奈緣峰上數多歌

烏龍木少勢嵯峨門戶寬宏水直過若得兩湖通

一處即時顯貴富民多

寇盜

寇盜之生必有所以致之或科斂煩急或饑饉

游臻或惰游不禁三者皆足致盜若吏盡其職

民安其業帶牛佩犢之徒咸歸南畝則萌蘖何

自而生哉志寇盜

唐陳碩真睦州女子始言仙去與鄉鄰訣或告其詐

已而捕得詔釋不問於是姻家章叔徹妄言碩

真自天還化為男子能役使鬼物轉相煽惑永

壽中遂舉兵及自稱文佳皇帝以叔徹為僕射

破睦州攻歙遣其黨圍婺州刺史崔義元發兵

拒之其徒爭言碩真有神靈犯其兵輒滅宗懼

不肯用命參軍崔元籍曰仗義起兵猶無成此乃妖人勢不可持久義元乃命元籍爲先鋒而自統衆繼之至下涯戍擒其黨數十人有星墜賊營義元曰賊必亡詰朝奮擊左右有以盾障者義元曰刺史若避誰肯死叱去之由是衆爲用斬首數百級降其衆萬餘賊平拜義元御史大夫

陳晟鎮海節度使周寶裨將顧餘杭鎮使中和四年攻睦州逐刺史韋諸朝廷因命晟爲刺史乾寧四年淮南將安仁義攻之不克而還光化三年宣州將康儒攻之吳越王錢鏐使其弟鉞往救之儒食盡遁歸晟據州十八年而死弟詢代立畏鏐忌已適因徐綰亂與田頔通鏐疑之割桐廬隸杭州詢遂與鏐絕鏐遣指揮使楊習攻之詢奔廣陵

元章焞衢州人至元十三年四月自衢婺作亂五月二十日偕其黨唐良嗣方忠義自蘭谿來犯三河界峻都宣撫遣摺討焦興總管高興擊却之斬忠義六月十二日復使楊武烈來侵峻都宣撫遣萬戶嚴忠傑總管高興擊却之六月二十

五日賊黨華貴華明華采五以三萬人越壽昌
犯白沙渡據羅桐埠唆都遣千戶孫繼文同知
杜榮大戰逐北至衢之白馬賊洞焚其巢穴而
還

樂萬戶於潛人元表率衆構亂烏合至數千人皆
以紅巾裹頭號紅頭巾自杭至徽轉掠淳安建
德地方窮鄉下邑無處不到至桐廬邑人王舉
姚邦采邵暉等糾募義旅敗之於安樂鄉未幾
少保常遇春自新城來李同簽自嚴州下合師
大戰盡破紅巾之衆

明王驥生許都別部也崇正十六年癸未西南流
猖獗都乘機以金華叛睦郡戒嚴冬十二月驥
生率多人且挈家口僞若避亂者突入興仁門
見郡守胡崇德曰我等遠來願爲公保此地但
樹我號幟敵不敢窺矣時致仕大中丞宋賢疑
其言貌謂守曰是殆欲爲許都內應者乎察之
果然遂執其衆斬十九人于宣化坊驢生縋城
遁去旣而捕獲併斬之都受招安亦戮于杭州

邵伯景淳安人劉萬冲黨也康熙十三年土寇韓

六合竊據壽昌萬冲寇淳安據之六合率衆潛
窺建德白沙埠協鎮鮑虎擊退之遂復壽淳
邑伯景將餘黨踞淳安山中劫掠乙卯三月紀
建德方山村適生員宋維藩避兵方山見伯景
諭以大義且密遣人迎邑令夏景松同生員王
國裕往撫之遂受招安散其黨歸農

論曰舊志云寇盜之乘必有自來歷觀古昔同符
谷輟遠不具論如方臘之聚於幫源則橫征苛斂
民不聊生出賦羨而賈禍胎者也紅巾之起於元
末則饑饉頻仍奸雄托藉因流亡而成揭竿者也

白蓮之倡於勝國則喫菜事魔燒香聚會縱異端
而出不意者也蓋盜賊之始以守令殲之而有餘
及乎燎原誓師命將曠日彌年取之而不足是故
水旱蠱蟻救之惟恐不至三時兩稅用之不盡其
財民皆怛業游惰之必禁而邪說之必誅夫然後
萬物熙熙咸優游於化日舒長之下爾建德俗樸
而民貧三農而外半屬樵漁室鮮女紅市多游手
聖明在上循良接踵水旱必聞追呼不擾亦旣綏輯
之有素矣惟是承平日久戶口繁昌地不加廣謀
生日戚閭井有失業閒民川塗多窮乏漁戶兼之

浮寄貧人結棚聚處而山城硤确地勢偏隅素非
產米之鄉亦非商販所集市糴不繼易致囂紛理
斯土也庶幾有思深慮遠之謨哉



英德縣志卷之十終

文化甲子

